

DIDZA' DXI'A BUZÚAJË' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru',

² ca na' bila'lé'e nupa ni' dza ni'te, ate' bulu'luí'i rë'u, en bulu'zë didza' que.

³ Teófilo, bönni' tsáhuí'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te.

⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' xzí'ini xi'sóë' Aarón, bönni' gúquië' bixúz lo dza ni'te.

⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bë' xibá queë'. Caní guca, cunttu nu guca bi innë quégaquië'.

⁷ Cunttu nu zoa bi'i quégaquië', tu' nácanu Elisabet nigula huödx, ate' chinagúlagaquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'.

9 Ca naca le nulaga lógaquië' tunë' bixúz, gula' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios.

10 Tsanni ni' ruzégui'ë Zacarías na' yalaj, gula'cuá' yúgu'të bönachi ní'lö, tu'lidza Dios.

11 La' ná'asö buluí'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj.

12 Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'.

13 Ní'irö gubáz lá'ayi na' gudxë' lë', gunnë':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan.

14 Gata' quiu' le uzi'u xibé, en udzéjanu', ate' zían nupa ulu'dzeja ládxi'gaca cate' gálajbi' bí'ido' na',

15 tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'.

16 Gunë' Juan ni ga ulu'huöáca zían bönachi Israel queë' Xanru'.

17 Inöruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácgaca xuz len zxí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu në'eguequi Xanru'.

18 Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chínagúla' neda', en chinagúlanu ca' nigula quia'.

19 Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ílena' li' didza', en usiyönda' li' didza' dxi'a ni.

²⁰ Na'a, tu' cabí guyéajlë'u xtídza'a, icödzu', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.

²¹ Tsanni ni' raca lë ni, nacuá' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi.

²² Cate' burúajë' Zacarías, biti' guca gü'ílenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

²³ Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'.

²⁴ Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnnanu:

²⁵ “Caní runë' Xanru' quia'. Ruzá' ládxië'ë quia' bí'ido', en runë' ga bíti'rö utuí'ida' lógaca bönachi.”

Rigúixjö'ë gubáz lá'ayi ca si' gálajbi' Jesús

²⁶ Cate' chiguca xopa beo', buluí'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzö luyú Galilea.

²⁷ Dios gusöl-lë'ë lë' ni' tsöjyüë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'alenbi'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te.

²⁸ Cate' guyázië' Gabriel na' ga zóabi' María, gudxë'-bi':

—Padiux. Dios ruzá' láchxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

²⁹ Cate' bilé'ebi' María gubáz lá'ayi na', guró'öbi' böniga tu' nözi didza' na' bë'ë, en rubani láchxi'bi' nacxi sa'yéaj didza' na' bulidzë'-bi' gubáz lá'ayi na'.

³⁰ Ní'irö gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' láchxë'ë Dios quiu'.

³¹ Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús.

³² Jesús ni tsëpisëtë'rë, en si' Lë' Zxí'inë' Dios, Nu nayëpisëtë'rö. Xanru' Dios gunë' ga inná bë'ë ca na' gunná bë'ë David, xuz gula gudödi queë'.

³³ Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayëpisëtë'rö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios.

³⁶ Cá'anqueze Elisabet, nigula di'a dza quiu', chinuá'anu-bi' lë'ënu tubi' bi'i bönni'do' sal-la' chinagúlanu. Gula'nnë' queënu: “Nácanu nigula huödx”, pero chizéaj xopa beo' nuá'anu-bi' lë'ënu bí'ido' na'.

³⁷ Bití' bi' zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzo luyú Judea.

⁴⁰ Ni' guyázabi' lidxë' Zacarías, en gúdxibi'-nu Elisabet:

—Padiux.

⁴¹ Cate' biyöñinu Elisabet didza' na' bë'ëbi' María, la' butátë cuinbi' bi'i hué'ënido' na' yú'ubi' lë'ënu, ate' bidisóalenë'-nu Dios Bö' Lá'ayi.

⁴² Ní'irö bë'ënu Elizabet zidzaj didza', rñnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lë'u!

⁴³ ¿Núzxitë neda', zá'anu xinë'ë Xana' quia'?

⁴⁴ Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i hué'ënido' ni yú'ubi' lë'a.

⁴⁵ ¡Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

⁴⁶ Ní'irö gunabi' María:

¡Idútë le naca' rigú'u Xanru' yöl-la' ba,

⁴⁷ en rudzeja ládxi'lëna'-në' Dios, Nu rusölá neda'!

⁴⁸ ¡Dios caz buzá' ládxi'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca' quia' ila'nná:

Bica' ba nigula na'.

⁴⁹ ¡Zxöntë'rö naca le benë' Dios unná bë' quia'!

¡Lá'ayi naca Lë'!

⁵⁰ Lë' ruhuéchi' ládxi'tica'së' bönachi tadxí Lë' na'a dza, en dza zá'gaca.

- 51 Yugu' yöl-la' huáca zxön chibenë' Lë'.
 Buzötjë' nupa gulún zxön yöl-la' réajni'i quéguequi.
 52 Bugüë' yöl-la' unná bë' quégaca nupa gulaca lo,
 en benë' ga gulaca lo nupa gulaca nōxaj ladxi'.
 53 Benë' ga bulu'huōlaj bulu'dzë'e nupa gula'dún,
 en bucá'anë' cá'asö nupa bila'lé'e yöl-la' tsahui'.
 54 Gúcalenë' bōnachi Israel, nupa na' tun xichinë',
 tu' yōjnenë' légaquië', en buéchi' lādxcë'ë légaquië'.
 55 Benë' ca guzxi' lu nē'ë gunë' quégaquië' xuz
 xtó'oru'
 enca' queë' Abraham, en quégaca di'a dza queë'.
- 56 María bugá'analenbi'-nu Elisabet idú ca
 tsonna beo', ate' gudödi ni' böajbi' lídxibi'.

Le guca cate' gúlajbe' Juan, bönni' uquilë' bōnachi nisa

- 57 Cate' bidxín dza ral-la' sóabi' bí'ido' queënu
 Elisabet, buzóanu-bi' tubi' bi'i bönni'do'.
- 58 Bila'yōni dzaga yu'u queënu, en yugu' di'a dza
 queënu ca na' guca, buéchi' lādxcë'ë-nu Dios, ate'
 bulu'dzëjalén lënu.
- 59 Cate' chiguca xunu' dza zóabi' bí'ido' na',
 bila'dxinë' di'a dza queënu para ila'chúguië' lu
 xipéla'bi' bi'i bönni'do' na' lë na' gaca bë' néquibi'
 queë' Dios, ate' té'ënnë' ilu'ë labi' Zacarías ca na' lë
 xúzibi'.
- 60 Ní'irö bubí'inu didza' Elisabet, xiná'abi', rn-
 nanu:
 —Calëga. Juan si' labi'.
- 61 Gula'nábinë'-nu, ta'nnë':
 —¿Bixx que? Cuntu nu di'a dza quiu' lë' Juan.
- 62 Ní'irö bulu'lá' bulu'luí'isinë', gula'nábinë'
 xúzibi' nacxi rë'ënnë' gu'ë labi'.

63 Zacarías na' gunabë' tu blágado', ate' buzúajë' lahui caní: Juan lëbi'. Bulu'báninë' yúgu'të'.

64 La' níisö böáljatë ru'ë Zacarías na', en buguítjatë lúdxë'ë, ate' bë'ë didza' le gulu'ë Dios yöl-la' ba.

65 Ní'irö guládxinë', en bulu'báninë' yúgu'të dzaga yu'u quégaquië', ate' yúgu'të yödzödo' nacuá' lu guí'ado' luyú Judea, guzé didza' ca guca lë ni.

66 Gula'zá' ládxi'gaca yúgu'të nupa bila'yöni ca na' guca, ta'nná: "¿Nacxi caz gácabi' bi'i bönni'do' ni? Le nácatë Xanru' zóalenë'-bi'."

Didza' bë'ë Zacarías uláz queë' Dios

67 Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë' Dios, rnnë':

68 ¡Yöl-la' ba Dios, Xángaca bönachi Israel tu' buduyúë' rë'u, bönachi queë', en böá'uë' rë'u!

69 ¡Gusöl-lë'ë queëru' Bönni' usölë' rë'u, len yöl-la' huáca zxön queë'!

Bönni' ni guljë' ládajgaca di'a dza queë' David, huen dxin queë' Dios.

70 ¡Dza ni'te guzxí' lu në'ë gunë' ga gaca caní! Raca ca na' gunné' lu ruá'agaquië' bönni' gulu'ë didza' uláz queë'.

71 Guzxí' lu në'ë usölë' rë'u lu ná'agaca nupa tequi rë'u zi', enca' lu ná'agaca nupa biti' ta'lé'e rë'u dxi'a.

72 Guzxí' lu në'ë huéchi' ládxe'ë xuz gudödi queëru', en tsöjnenë' le guzxí' lu në'ë le naca lá'ayi.

73 Lë ni benë' tsutsu xtídzë'ë, en guzxí' lu në'ë, le gunë' queë' Abraham, xuz gudödi queëru', le naca tu le ral-la' gunë' queëru' rë'u.

74 Guzxí' lu në'ë usölë' rë'u

lu ná'agaca nupa biti' ta'lé'e rē'u dxi'a
 para cabirō gádxiru' gunru' xichinē' Lē',
⁷⁵ en para gácaru' ba'a ladxi', en idú dxi'a
 lahuē' Lē' yúgu'tē dza sóaru' ibanru'.
⁷⁶ Li', xzí'ina'do', si' lo' bönni' ru'ë didza' uláz queë'
 Dios unná bē'
 tu' tsöjnöru' ca Xanru' caz, en upó'o nöza ga tödē'.
⁷⁷ Gunu' ga ila'nözi bönachi queë' ca gaca ulu'lágaca,
 en ca na' uniti lahuē' Dios dul-la' nabága'gaca.
⁷⁸ Caní gaca, tu' ruhuéchi'da' ládxi'ë Dios rē'u,
 en runē' ga tsení' queëru' Bönni' na' náquiē' bení'
 idú.
⁷⁹ Lē' uzení'ë quégaca nupa nacué' gapa naca chul-
 la,
 en gapa nacué' nupa chizóa ilátigaca
 para ugú'ë rē'u nöza ga cō'ö dxi ládxi'do'oru'.
⁸⁰ Guzxönbi' bi'i bönni'do' na', en bidipa ládxi'bi'.
 Guzósibi' gapa naca lu lataj cá'asö cate' bidxinrö
 dza buluí'i lobi' lógaca bönachi Israel.

2

Le guca cate' gúlajbi' Jesús (Mt. 1:18-25)

¹ Lu dza na' gunná bē'ë Augusto César, bönni'
 Roma, ila'yaza lu guichi yúgu'tē bönachi nacué'
 yödzölió.

² Cate' gusí lo ta'yaza lu guichi caní, rinná bē'ë
 bönni' lē' Cirenio luyú Siria.

³ Yúgu'tē bönachi yójaca yödzö que queëguequi ga
 na' zeaj nababa para ila'yaza lu guichi.

⁴ Guzë'ë José yödzö Nazaret luyú Galilea,
 sa'yéajë' luyú Judea, en bidxinē' yödzö Belén,

ga ni' guljē' David, tu' guljē' José ládajgaca di'a dza queē' David na'.

⁵ Guyijē' José ni' para tsáziē' lu guichi, ate' dzágabi'-nē' María, bi'i nigula nazí' lu ná'abi' ut-saga ná'alēnbi' lē', en chizóa sóabi' bí'ido' queēbi'.

⁶ Cate' ni' nacu'ē lu yōdzō Belén, bidxín dza sóabi' bí'ido' queēbi'.

⁷ Buzóanu-bi' tubi' bi'i bönni'do', bi'i huáca queēnu. Buchölinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ē lu yu'u ga ni' ta'dxín bönachi yú'ugaca nöza.

Tu'lu'i lahuē' gubáz lá'ayi queē' Dios ga nacu'ē bönni' tu'yúē'-ba' bö'cu' zxila'

⁸ Gala' ra' yōdzō Belén nacu'ē bönni' tu'yúgaquiē'-ba' bö'cu' zxila' la' guixi', tapa chí'igaquiē'-ba' chi'i dzö'ölö.

⁹ La' buluí'itē lahuē' gubáz lá'ayi queē' Xanru' ga na' nacu'ē. Yöl-la' bení' queē' Xanru' buzení' ga na' nacu'ē, ate' guládxinē'.

¹⁰ Ní'irö gubáz lá'ayi na' gudxē' légaquiē', rnnē':
—Biti' gádxili'. Na'a rusiyōnda' libí'ili' didza' le gun ga udzėjade'eli', le ulu'zí' ca' xibé yúgu'tē bönachi.

¹¹ Na'a chigúlajbi' lu ladzē' David Nu usölá libí'ili'. Nu ni naca Cristo, Xanru'.

¹² Lē ni gaca bē'ēbi'. Udzöli'bi' Bí'ido' na', narölibi' yugu' lári'do', en dēbi' tu lu yú'udo' ga tun chi'i le táguba' böa' quégaca bönachi yú'ugaca nöza.

¹³ Ga na' zoē' gubáz lá'ayi na', tsárido'os bulu'luí' lógaquiē' zíanrö ca' gubáz lá'ayi queē' Dios,

narúajgaquië' yehua' yubá, en ta'gu'ë Dios yöl-la' ba, ta'nnë':

14 ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxe'ë Dios légaquië'!

15 Cate' bulu'zé'ë gubáz lá'ayi na' ga ni' nacu'ë,
söjhuöjgaquië' yehua' yubá, ní'irö gulë luzë'ë tuë'
ia'túë' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca
ca na' chibusiyönnë' Xanru' rë'u.

16 La' yöjácatië', ate' yöjxáca'gaquië' María len
José, enca' bí'ido' na', dëbi' tu lu yú'udo' ga tun chi'i
le táguba' böa' quégaca bönachi yú'ugaca nöza.

17 Cate' bila'lé'enë' lëbi', gula'guíxjö'ë lë na'
si' busiyönnë' gubáz lá'ayi na' légaquië' ca naca
queëbi' bí'ido' na'.

18 Bulu'bani yúgu'të nupa bila'yöni didza' gulu'ë
bönni' tu'yúë' bö'cu' zxila' na'.

19 María gulú'usö icja náganu didza' ni, ate' guzá'
ládxi'nu ca naca que.

20 Söjhuöjgaquië' bönni' na' tu'yúë'-ba' bö'cu' zx-
ila', tunë' zxön Dios, en ta'gu'ë Lë' yöl-la' ba ni'a que
yúgu'të lë na' bila'yönnë', en bila'lé'enë', le guca ca
na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

21 Cate' chiguca xunu' dza zóabi' bí'ido' na',
gula'chúguië' lu xipëla'bi' lë na' naca bë' néquibi'
queë' Dios, ate' gulu'ë labi' Jesús ca na' chibë' cazë'
labi' gubáz lá'ayi na' zí'alö cate' si' tsú'ubi' lë'ënu
xiná'abi'.

22 Cate' chibizá'a dza que le tu'pá'a cuíngacanu nigula ca rinná bē' xibá queē' Moisés, gula'chē'ē-bi' bí'ido' Jesús yōdzō Jerusalén para ila'gu'ē-bi' lu nē'ē Xanru' Dios.

23 Caní gulunē', tu' nazúaj lu guichi lu xibá queē' Xanru' le rna: "Yúgu'tēbi' bi'i bōnni'do' nácagacabi' bi'i zí'alō queēnu xiná'agacabi', ulu'béajē'-bi' quez queē' Xanru' Dios."

24 Que lē ni na' yōjáquiē' ni' para ilútiē'-ba', en ila'gú'ē-ba' lahuē' Dios chópaba' gúgudo' o chópaba' budōdu' ca na' rinná bē' xibá queē' Xanru' Dios.

25 Dza ní'isō zoē' tu bōnni' lē' Simeón lu yōdzō Jerusalén. Bōnni' ni náquiē' tsahui', en reaj lādxē'ē Dios. Ribōzē' Bōnni' na' isōl-lē'ē Dios, Bōnni' na' gácalenē' bōnachi Israel. Dios Bō' Lá'ayi zóalenē' Simeón na',

26 en chibulu'inē' lē' biti' gátie' cate' ilé'erōnē' Cristo, Bōnni' na' isōl-lē'ē Xanru' Dios.

27 Bidxinē' Simeón na' chila yudo' tu' guchē'ē Dios Bō' Lá'ayi lē' ni'. Cate' xuz xiná'abi' gula'chē'ē-bi' bí'ido' Jesús chila yudo' para ilunē' queēbi' ca rinná bē' xibá na',

28 ní'irō bunidē'-bi' Simeón na', en guyéaj lādxē'ē Dios, rnnē':

29 Xana', na'a huáca gunnu' neda' lataj gátia', soa dxi lādxá'a

tu' chiguca le gudxu' neda', huen dxin quiu'.

30 Chibilé'eda' Nu na' buzóa cazu', Nu usölá bōnachi,

31 Nu na' ulú'u lahui lógaca yúgu'tē bōnachi.

32 Lēbi' nácabi' bení' le uzení' bōnachi izá'a, en nácabi' ca' bení' quégaca bōnachi Israel quiu'.

³³ Bulu'báininë' José, en María, xiná'abi' bí'ido' Jesús, ca naca læ na' gunné' Simeón ca naca queëbi' Jesús.

³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zián, ate' ulu'huóása bönachi zián ladaj bönachi Israel. Gácabi' tu le naca bë', ate' ila'nnë bönachi queëbi'.

³⁵ Gaca caní para ila'lá' lahui le ta'zá' ládxi'gaca bönachi zián. Yugu' læ ni ilaca quiu' ca tu guié tuchi' le tsaza ládxi'do'o.

³⁶ Ana, nigula ru'ínu didza' uláz queë' Dios, zóanu ca'ni'. Nácanu zxi'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando',

³⁷ ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios.

³⁸ La' ná'asö bidxíntënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacué' Jerusalén, nupa ta'böza dza idxín Nu na' isól-lë'ë Dios para gácalen bönachi.

Söjhuöjgaquië' José, en María yödzö Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuöjgaquië' ládzagaquië' Nazaret luyú Galilea.

40 Guzxönbi' bí'ido' Jesús, en bidipa ládxi'bi'. Guta' queébi' yöl-la' réajni'i, ate' zxön naca le ruzá' ládxe'ë queébi' Dios.

Rudxinbi' bí'ido' Jesús chila yudo'

41 Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto.

42 Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'.

43 Cate' gudödi laní, söjhuøjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María, xiná'abi' Jesús.

44 Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljë'-bi' gapa nacuá' di'a dza quégaquië', en gapa nacuá' nupa núnbë'gaquië'

45 biti' bulu'dzölinë'-bi'. Que lë ni na' yöjhuøjgaquië' Jerusalén, söjdíljagaquië'-bi'.

46 Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'.

47 Bulu'bani yúgu'të nupa bila'yöni didza' bë'ëbi' ca naca yöl-la' réajni'i queébi', en ca nácagaca didza' bubí'ibi'.

48 Cate' bila'lé'enë'-bi' xuz xiná'abi', bulu'báninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queétu'? Buyútsöca', len yöl-la' ruúbi ruguí'i neda', en xuzu' buguíljatu' li'.

49 Ní'irö gúdxibi' Jesús légaquië', rnnabi':

—¿Bixx que buguúljali' neda'? ¿Naru' cabí nõzili' run bayudxi guna' xichinë' Xuza'?

⁵⁰ Biti' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbi' légaquië', budxinbi' Nazaret, ate' benbi' ca rnaa xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni.

⁵² Ráta'rö yöl-la' réajni'i queëbi' bi'i Jesús, en rizxönbí'. Burúajbi' dxi'a lahuë' Dios, en lógaca bönachi.

3

*Libán runë' Juan, bönni' ruquilë' bönachi nisa
(Mt. 3:1-12; Mr. 1:1-8; Jn. 1:19-28)*

¹ Cate' chiguca chinu iz rinná bé'enë' Tiberio César idútë yödzülió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia.

² Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, xzí'inë' Zacarías, didza' cate' ni' zoë' Juan lu lataj cá'asö.

³ Ridë' Juan ni yúgu'të lataj nacua' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Dios dul-la' nabága'gaca.

⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rnaa:

Riyön chi'ë bönni' rulidzë' lu lataj cá'asö, rnnë':

“Buli’pá’a nöza lu icja láchido’oli’ para idxín Xanru’ queéli’.

Buli’béaj li yugu’ nöza lasi ga tödë’.

⁵ Ral-la’ ulígaca yúgu’të gapa naca röga’, en ulu’huóáca lachi’ yúgu’të guí’a sibi, en guí’ado’. Ral-la’ ulu’rúaj li nöza nayecja nabí’igaca, ate’ ulu’huóáca dxi’a nöza guiöj.

⁶ Ila’lé’eni yúgu’të bönachi Bönni’ na’ isöl-lë’ë Dios, Nu usölá bönachi.”

⁷ Cate’ bila’rúaj bönachi zían para ila’dila nisa lu në’ë Juan, lë’ gudxë’ légaquië’:

—Libi’ili’, di’a dza quégacaba’ bëla sínia’. ¿Zoa nu bulu’i libí’ili’ ral-la’ izxúnajli’ yöl-la’ rusiúdxí si’ gaca quégaca bönachi?

⁸ Na’a, guli’gún le ilaca bë’ chibubí’i láchí’li’, en bití’ sa’ láchí’li’, bití’ innali’: “Nácatu’ tsahui’ tu’ nácatu’ di’a dza queë’ Abraham”, tu’ rea’ libí’ili’, huáca qué’lë’ë Dios yugu’ guiöj ni, en gunë’ ga ulu’huóáca di’a dza queë’ Abraham.

⁹ Nácali’ ca yugu’ yaga. Chizóa riböza guié huága para ichugu yugu’ yaga. Yúgu’të yaga bití’ ta’bía le naca dxi’a, ila’chúguië’ yaga na’, en ila’gu’ë léguequi lu guí’.

¹⁰ Ní’irö bönachi nacué’ ni’ gula’nabi lë’, ta’nná:

—¿Nacxi gúntsatu’?

¹¹ Bubi’ë didza’ Juan, rë’ légaquië’:

—Nu dë chopa cö’ zxe ral-la’ unödzej que nu bití’ dë que, ate’ nu dë le gagu, lësca’ caní ral-la’ quisi quégaca nupa bití’ dë le ilágugaca.

¹² Bal-lë’ bönni’ tu’quizxjë’ lázagaca bönachi uláz que yödzö zi’ tu’ bila’dxinë’ ca’ ni’ para ila’dilë’ nisa, ate’ gula’nabinë’ lë’, ta’nnë’:

—Bönni’ usëdi, ¿nacxi gúntsatu’ netu’?

13 Juan gudxë' légaquië':

—Biti' uquízxjaröli' tsca le chigunnë' bönni' yú'uli' lu në'ë.

14 Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Biti'rö gun gádxili' bönachi para cúali' le dë quéguequi. Bítirö innëli' quégaca bönachi le cabi nácatë para gunli' ga ila'guizxaj libí'ili', pero guli'tsaza ládxi'li' tsca rázxfali'.

15 Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo.

16 Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluí'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' bití' naca'lesaca' ilecja' le nudë'ë ni'e.

17 Zönë' lu në'ë böcö' queë', ate' ulubë' ga rilubi zxa' xtila queë', lë ni ruluí'i le gaca quégaca bönachi. Utubë' zxa' xtila, en cu'ë le xilataj, pero bëbu que uzégui'ë lu guí' le catu caz ulu.

18 Ca nácgaca didza' ni, en ia'zíca'rö zían didza' le guchízië' icja nággaca bönachi, benë' libán Juan lógaquië' que didza' dxi'a.

19 Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá dö'.

20 Ní'irö benë' Herodes tu le nácarö huiá' dö', gulu'ë Juan na' lidxi guíë.

*Ridíle' Jesús nisa**(Mt. 3:13-17; Mr. 1:9-11)*

²¹ Dza na' cate' cabí nadzunë' Juan lidxi guë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba,

²² ate' bötjë' Dios Bö' Lá'ayi, bidxinë' ga na' zoë' Jesús. Buluí'i lahuë', rinë'ë ca riná' tuba' gu'dödo', ate' biyön chi'i Nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús**(Mt. 1:1-17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxí'inë' José. Jesús náquië' zxí'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxí'inë' Matat,

nu ni guca zxí'inë' Leví,

nu ni guca zxí'inë' Melqui,

nu ni guca zxí'inë' Jana,

nu ni guca zxí'inë' ia'tué' José.

²⁵ José ni gúquië' zxí'inë' Matatías,

nu ni guca zxí'inë' Amós,

nu ni guca zxí'inë' Nahum,

nu ni guca zxí'inë' Esli,

nu ni guca zxí'inë' Nagai.

²⁶ Nagai na' gúquië' zxí'inë' Mat,

nu ni guca zxí'inë' ia'tué' Matatías,

nu ni guca zxí'inë' Semei,

nu ni guca zxí'inë' ia'tué' José,

nu ni guca zxí'inë' Judá.

²⁷ Judá na' gúquië' zxí'inë' Joana,

nu ni guca zxí'inë' Resa,
nu ni guca zxí'inë' Zorobabel,
nu ni guca zxí'inë' Salatiel,
nu ni guca zxí'inë' Neri.

²⁸ Neri na' gúquië' zxí'inë' ia'túë' Melqui,
nu ni guca zxí'inë' Adi,
nu ni guca zxí'inë' Cosam,
nu ni guca zxí'inë' Elmodam,
nu ni guca zxí'inë' Er.

²⁹ Er na' gúquië' zxí'inë' Josué,
nu ni guca zxí'inë' Eliezer,
nu ni guca zxí'inë' Jorim,
nu ni guca zxí'inë' ia'túë' Matat.

³⁰ Matat na' gúquië' zxí'inë' Leví,
nu ni guca zxí'inë' Simeón,
nu ni guca zxí'inë' Judá,
nu ni guca zxí'inë' ia'túë' José,
nu ni guca zxí'inë' Jonán,
nu ni guca zxí'inë' Eliaquim.

³¹ Eliaquim na' gúquië' zxí'inë' Melea,
nu ni guca zxí'inë' Mainán,
nu ni guca zxí'inë' Matata,
nu ni guca zxí'inë' Natán.

³² Natán na' gúquië' zxí'inë' David,
nu ni guca zxí'inë' Isaí,
nu ni guca zxí'inë' Obed,
nu ni guca zxí'inë' Booz,
nu ni guca zxí'inë' Salmón,
nu ni guca zxí'inë' Naasón.

³³ Naasón na' gúquië' zxí'inë' Aminadab,
nu ni guca zxí'inë' Aram,
nu ni guca zxí'inë' Esrom,

nu ni guca zxí'inë' Fares,
nu ni guca zxí'inë' ia'tué' Judá.

³⁴ Judá na' gúquië' zxí'inë' Jacob,
nu ni guca zxí'inë' Isaac,
nu ni guca zxí'inë' Abraham,
nu ni guca zxí'inë' Taré,
nu ni guca zxí'inë' Nacor.

³⁵ Nacor na' gúquië' zxí'inë' Serug,
nu ni guca zxí'inë' Ragau,
nu ni guca zxí'inë' Peleg,
nu ni guca zxí'inë' Heber,
nu ni guca zxí'inë' Sala.

³⁶ Sala na' gúquië' zxí'inë' Cainán,
nu ni guca zxí'inë' Arfaxad,
nu ni guca zxí'inë' Sem,
nu ni guca zxí'inë' Noé,
nu ni guca zxí'inë' Lamec.

³⁷ Lamec na' gúquië' zxí'inë' Matusalén,
nu ni guca zxí'inë' Enoc,
nu ni guca zxí'inë' Jared,
nu ni guca zxí'inë' Mahalalel,
nu ni guca zxí'inë' ia'tué' Cainán.

³⁸ Cainán na' gúquië' zxí'inë' Enós,
nu ni guca zxí'inë' Set,
nu ni guca zxí'inë' Adán,
nu ni guca ca zxí'ini cazë' Dios.

4

Satanás tu' xihui' rë'ëni usubaga' Jesús dul-la'
(Mt. 4:1-11; Mr. 1:12-13)

¹ Buzě'ë Jesús ra' yegu Jordán, zóaleně' Dios Bō Lá'ayi Lě', ate' Dios Bō Lá'ayi na' guchě'ë Jesús lu lataj cá'asō.

² Guzōë Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudōdi ni' riduně'.

³ Ní'irō tu' xihui' na' gudxi Jesús, rnna:

—Channō naca cazu' Li' Zxí'ině' Dios, gunnásōca' ulu'huōáca guiōj ni' yōta xtila.

⁴ Bubi'ë didza' Jesús, rě' le:

—Nazúaj lu guichi, rnna: “Calěgasō yōta xtila nabánigaca bōnachi, pero nabánigaca ca' yúgu'tě xtídzě'ë Dios.”

⁵ Ní'irō guchě' tu' xihui' na' Jesús ga naca tu lu gu'a sibi ate' tu chí'ido'osō buluí'i Lě' yúgu'tě xilátjagaca nupa ta'nná bě' yōdzōlió.

⁶ Tu' xihui' na' rě Jesús, rnna:

—Gunna' quiu' yúgu'tě xilátjagaca nupa ta'nná bě' ni, en yōl-la' tsahui' quéguequi, tu' nadōdi lu na'a yúgu'tě lě ni, ate' nu rě'ënisida' ruá'a que.

⁷ Channō Li' uzóa zxibu' lahua', en gunu' neda' zxōn, yúgu'tě lě ni guequi quiu'.

⁸ Bubi'ë didza' Jesús, rě' le:

—Gucuita ga zoa', Satanás, tu' nazúaj lu guichi lá'ayi le rě netu', rnna: “Xanu' Dios tseaj ládxu'u-ně', en tuzě' Lě' gunu' xichinë'.”

⁹ Ní'irō tu' xihui' na' guchě' Jesús Jerusalén, ate' budxía Lě' lu zō'ō ícjo'olō yudo', en rě Lě':

—Channō nacu' Zxí'ině' Dios, busuládzu'tsōca' cuinu' ni

¹⁰ tu' nazúaj lu guichi lá'ayi, rnna:

Dios isōl-lě'ë gubáz lá'ayi queë', ilácaleně' Li'.

11 Lu ná'agaquië' ulu'chisë' Li' para cabí
tsöjchégu'u guiöj,
en biti' gunu' zi' ni'u.

12 Bubi'ë didza' Jesús, rë' le:

—Nazúaj lu guichi lá'ayi le rë netu': "Biti' si' bë'u
Xanu' Dios."

13 Cate' biti' budzöli tu' xihui' na' ia'tú le si' bë'
Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

14 Böajë' Jesús luyú Galilea, dë lu në'ë yöl-la'
huáca queë' Dios Bö' Lá'ayi. Guzé didza' ca naca
queë', ate' bila'yöni bönachi nacuá' yúgu'të yödzö
idú gásibi'ilö.

15 Busédinë' Jesús bönachi gapa naca lu yu'u
ga tu'dubë' tu'sedë' bönni' judío queë' Dios, ate'
yúgu'të bönachi gulún Lë' zxön.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

16 Ní'irö budxinë' Jesús yödzö Nazaret ga ni'
guxxönë'. Cate' bidxín dza lá'ayi quégaquië' bönni'
judío, ca run cazë' Jesús, guyázië' lu yu'u ga
tu'dubë' tu'sedë' bönni' judío queë' Dios, ate'
guzuínë' para ulabë' tu le nazúaj lu guichi lá'ayi.

17 Bulu'dödë' lu në'ë Jesús guichi ga na' nazúaj
didza' bë'ë Isaías, bönni' bë'ë didza' uláz queë' Dios.
Cate' gusaljë' guichi na', budzölinë' ga nazúaj lu
guichi le rnna:

18 Zóalenë' Bö' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zi'
ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölá' bönachi zoa nu run léguequi zi',

¹⁹ en guna' libán que dza ruzá' ládxe'ë Xanru' Dios
quégaca bönachi.

²⁰ Ní'irö butubë' Jesús guichi na', en bugu'ë le
lu në'ë bönni' rapa chi'ë yugu' guichi lá'ayi, ate'
gurö'ë. Ní'irö yúgu'të nupa nudúbigaca lu yu'u na'
gula'ná' Jesús.

²¹ Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu
guichi ni.

²² Yúgu'të' gula'nnë' dxi'a queë', en bulu'bánninë'
ca naca didza' dxi'a ru'ë, ate' ta'nnë':

—¿Naru' calëga bönni' ni xzí'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bönachi, le rnna:
“Li', bönni' ruún bönachi, bun cuinu'.” Lëasca' caní
huëli' neda': “Yugu' le biyönitu' benu' Capernaum,
ben ca' ga ni naca ladzu'.”

²⁴ Gunnë' ca' Jesús:

—Le nácatë rea' libí'ili', channö zoë' nu bönni'
ru'ë didza' uláz queë' Dios, bití' tun bönachi uládz
queë' lë' bal.

²⁵ Le nácatë rea' libí'ili', gula'cuá'anu zían nigula
uzëbi luyú Israel yugu' dza ni' zoë' Elías, bönni' bë'ë
didza' uláz queë' Dios, cate' ní' bití' gulaj guiöj idú
ca tsonna iz yu' xopa beo', ate' guca gubín luyú na',

²⁶ pero Dios bití' gusöl-lë'ë Elías na' ga nacué'anu
nigula uzëbi nabábagacanu Israel, pero gusöl-lë'ë

lë' ga na' zóanu tu nigula uzëbi lu yödzö Sarepta, le nababa yödzö Sidón.

²⁷ Lësca' caní, gula'cuá' zían nupa te'e huë nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero biti' böáquië' nu bönni' nútsë'ë ladaj bönachi Israel na', pero böáquië' tuzë' Naamán, bönni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sedë' queë' Dios.

²⁹ Ní'irö gula'yasë', en bulu'béajë' Jesús ní'ilö ra' yödzö. Gula'ché'ë Lë' ga naca lë'e guí'a guiöj ga na' dë ládzagaquië' para ulu'suláduë' Lë' ga naca lë'e guí'a guiöj na'.

³⁰ Ní'irö gudödë' Jesús gatsaj láhui'lö ga na' nacu'ë, söhuöajtë'.

Tu bönni' yu'u lë' bö' xihui'

(Mr. 1:21-28)

³¹ Ní'irö guyijë' Jesús yödzö Capernaum luyú Galilea, ate' busédinë' bönachi yugu' dza lá'ayi quégaquië' bönni' judío.

³² Bulu'báninë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

³³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sedë' queë' Dios, ate' bë'ë zidzaj didza',

³⁴ rnnë':

—¡Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

³⁵ Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bíti'rö bi ben queë'.

³⁶ Bulu'báinë' yúgu'të', en gulu'ë didza' tuë' len ia'tué', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bé'enë' yugu' bö' xihui', ate' tu'rúajtë bö' xihui' na'.

³⁷ Guzë didza' ca naca queë' Jesús, ate' bila'yöni bönachi yúgu'të yödzö idú gásibi'ilö.

Ruúnë' Jesús xiná'anu nigula queë' Pedro

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajë' lu yu'u ga na' tu'dubë' tu'sédë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu.

³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacuá'len léguequi nupa na' te'e que queëguequi yödzhuë' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi.

⁴¹ Bulu'rúaj ca' zían bö' xihui' yú'ugaca bönachi te'e na'. Ta'bódxí'a bö' xihui' na', ta'nná:

—Li' nacu' zxi'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

Runë' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bönachi zían ni', tu'guílaj Jesús. Cate' bila'dxinë' ga na' zoë', gulë'ë'niguequinë' ulu'tsenë' Lë', para cabí uzë'ë ga na' nacu'ë.

⁴³ Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

⁴⁴ Caní guca, benë' libán yugu' yödzö luyú Galilea gapa naca lu yu'u ga tu'dübë' bönni' judío, en tu'sëdë' queë' Dios.

5

Ta'dzunba' böla zían

(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios.

² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxön böla lë'egaca bárcodo' na', en ta'guibë' yöxaj böla quegaquië'.

³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látido' zi'tu' ga naca ra' yu bidxi na'. Ní'irö

gurö'ë Jesús lë'e bárcodo' na', en rō'ösë' ca' ni' rusédinë' bönachi zián nacuá' lu yu bidxi na'.

4 Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rō'ö zila, ate' ni' guli'zalaj yōxaj böla queéli' para sönli'-ba' böla.

5 Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönu'-ba', pero didza' quiu' izáljagara' yōxaj.

6 Cate' chigula'zaljë' le, gula'zönë' ziántëröba' böla, ate' réquitiqui' iröza' yōxaj böla na'.

7 Ní'irö bulu'lá'a bulu'lu'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa.

8 Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

9 Caní gunné' tu' radxi ridzöbinë' Pedro ni'a quégacaba' böla zián na' gula'zöngaquië'-ba', en lësca' caní guca quégaca nupa nacuá'len lë'.

10 Guladxi gula'dzöbinë' ca' Jacobo, en Juan, yugu' zxí'inë' Zebedeo, nupa ni' nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

11 Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sōjácalenë' Jesús.

*Ruúnë' Jesús tu bönni' ré'enë' huë' nudzu' ruzödi
(Mt. 8:1-4; Mr. 1:40-45)*

¹² Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

¹³ Ní'irö bulí në'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxitë huë' nudzu' queë' bönni' na'.

¹⁴ Ní'irö Jesús gunná bé'enë' lë' cuntu nu guié' ca'. Gudxë' lë':

—Guyéaj, yöjluí'i cuinu' lahuë' bixúz, ate' yöjnodzaj que yudo' le ruluí'i nuhuóácu' dxi'a ca gunná bë'ë Moisés, lë' na' uluí'i légaquië' chiböácu'.

¹⁵ Guzëtë'rö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi.

¹⁶ Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)*

¹⁷ Ia'tú dza, cate' ni' rusédinë' Jesús bönachi, rő'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacúa' ni'.

¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate'

bulu'guiljē' nacxi ilunē' para ila'gu'ë lē' lu yu'u para ila'guixjē' lē' lahuē' Jesús.

19 Cate' biti' gula'dzölinē' nacxi ilunē', tu' nacuá' bönachi zían ni', gula'benē' ícjo'olö yu'u na', en gula'saljē' ícjo'o na'. Ní'irö bulu'zötjē' le denē' bönni' huē' na', ate' gula'guixjē' lē' gatsaj láhui'lö bönachi ni' lahuē' Jesús.

20 Cate' gúquibe'enē' Jesús ca na' ta'yéajlē'ë Lē', gudxē' bönni' huē' na':

—Bönni', yugu' dul-la' nabágu'u chibuníti lahua'.

21 Ní'irö gula'sí lógaquiē' ta'zá' ládxi'gaquiē' bönni' yudo' tu'sédinē' na', en yugu' bönni' yudo' fariseo, ta'nnē': “¿Nuzxi caz bönni' ni rnnē' le rucá'ana Dios cá'asö? ¿Nuzxi caz gaca uniti lo dul-la'? Tuzē' Dios runiti lahuē' dul-la'.”

22 Réquibe'enē' Jesús le ta'zá' ládxi'gaquiē', ate' rē' légaquiē':

—¿Bizx que rizá' ládxi'li' caní'?

23 Biti' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasē', en sē'e ní'ë.

24 Guna' ga inözili' dé lu na'a neda', Bönni' Guljē' Bönachi, yöl-la' unná bē' uniti lahua' dul-la' luyú ni.

Ní'irö gudxē' bönni' na' nacú'uniē' bin, rnnē':

—Li' rea', guyasa. Buá' le denu', en böaj lidxu'.

25 La' guyásatē' bönni' huē' na' lógaquiē', ate' bu'ë lē' na' gúti'nē', en söhuöjē' lidxē', rigu'ë Dios yöl-la' ba.

26 Gula'nítitiqui'sinë' yúgu'tē', ate' gula'gu'ë Dios yöl-la' ba, en tádxisinē' ca', ta'nnē':

—Na'a bilé'eru' le run ga rubániru'.

*Jesús ruldzë' Leví**(Mt. 9:9-13; Mr. 2:13-17)*

²⁷ Gudödi gulaca yugu' lë ni burúajë' Jesús ni', ate' bilé'enë' tu bönni' uquíxzaj lázagaca bönachi, lë' Leví, rö'ë ga na' ruquíxjë', ate' Jesús rë' lë':

—Gudá' neda'.

²⁸ La' guyásatë' Leví, ate' bucá'anë' yúgu'të, en sa'yéajlenë' Jesús.

²⁹ Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zían bönni' uquíxzaj ni' len ia'bal-lë' bönni' ta'bö'lenë' légaquië' tahuë'.

³⁰ Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquíxzaj, en ia'zíca'rë' bönni' dul-la'?

³¹ Bubi'ë didza' Jesús, rë' légaquië':

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi.

³² Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

*Ta'nábinë' Jesús ca naca que yöl-la' run gubasa**(Mt. 9:14-17; Mr. 2:18-22)*

³³ Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

³⁴ Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'?

³⁵ Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

³⁶ Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tēbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlöza lari' tēbi na'.

³⁷ Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'.

³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chí'i.

³⁹ Channö zoa nu rë'aj xisi uva gula, bití' guë'ënitë guí'aj xisi uva cubi, tu' rnna: “Nácarö sizxí' xisi uva gula na'.”

6

Bönni' usëda queë' Jesús ta'lecjë' do zxoá' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla zxoá' xtila, ate' bönni' usëda queë' ta'lecjë' do ga dxía zxoá' xtila. Ta'z'xúbi'ni ná'agaquië' le, en tahuë'.

² Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

3 Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacua'len lë'?

4 Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacua'len lë'.

5 Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

6 Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sedë' queë' Dios, en busédinë' nupa nacua' ni'. Zoë' ca' tu bönni' ni' narequi' në'ë ibëla.

7 Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'.

8 Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'.

9 Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o uguáru' le?

10 Ní'irö buyúë' Jesús yúgu'të bönni' na' nacué' gásibi'ilë', ate' gudxë' bönni' huë' na':

—Bulí no'ó.

Bulí nē'ē bönni' na', ate' la' böacatē nē'ē na'.

¹¹ Ní'irö gula'lenē' bönni' yudo' na', ate' gulún xtídza'gaquiē' la' légacasē' nacxi bi ilunē' queē' Jesús.

Riböë' Jesús chínnuë' bönni' ilácagaquiē' gubáz queë'

(Mt. 10:1-4; Mr. 3:13-19)

¹² Dza ni' guyijē' Jesús ga naca tu lu gu'ado'. Bulidzē' Dios ni', ate' idú yēla bē'lenē' Dios didza'.

¹³ Cate' za' rení', bulidzē' yugu' bönni' dá'gaquiē' Lē', ate' guröë' chínnuë' para iláquiē' gubáz queë'.

¹⁴ Bulidzē':

Simón, (lē' ca' Pedro),

Andrés, (böchē'ē Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inē' Alfeo),

Simón, (bönni' ruí'i ládxē'ē yödzö queë'),

¹⁶ Judas, (böchē'ē Jacobo),

en Judas Iscariote, (bönni' udödē' Jesús lu ná'agaquiē' bönni' ilútiē' Lē').

Ruúnē' Jesús bönachi zían

(Mt. 4:23-25)

¹⁷ Jesús bötjalenē' yugu' bönni' gubáz queë' na' lu gu'ado' na', ate' bila'dxinē' tu ga naca lachi', ga ni' nacu'ē zíanrö ca' bönni' usēda queë', ate' nacuá'len légaquiē' bönachi zían narúajgaca yúgu'tē yödzö luyú Judea, en yödzö Jerusalén, en yugu' yödzödo' dēgaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zē nágagaca xtídzē'ē Jesús, en ulu'huöáca lu yödzöhuē' té'eguequi.

18 Bulu'huöáquië' ca' bönni' ni' ta'guí'i ta'záquië' lu ná'agaca bö' xihui'.

19 Yúgu'të bönachi zían na' tuí'i ládxi'gaca ila'gán Jesús tu' ruúnë' léguequi len yöl-la' huáca queë'.

Nupa náca'gaca bica' ba, en nupa náca'gaca bica' bayechi'

(Mt. 5:1-12)

20 Ní'irö buyüë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

21 'Bica' ba libí'ili' ridunli' le gunnë' Dios queëli', tu' huöljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzxídxili'.

22 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacúa', en ila'nnë zi' queëli', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljë' Bönachi.

23 Buli'sí' xibé dza na', en buli'dzeja, tu' naca zxön le guequi queëli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

24 'Bica' bayechi' libí'ili', dë yöl-la' tsahui' queëli', tu' chidë le ruzí'ili' xibé.

25 'Bica' bayechi' libí'ili' nuhuö'aj nudzé'eli' na'a, tu' huadunli'.

'Bica' bayechi' libí'ili' ruzxídxili' na'a, tu' huí'inili', en cödxí yéchi'li'.

26 'Bica' bayechi' libí'ili' ta'nnë yúgu'të bönachi dxi'a queëli'. Lësca' caní gulunë' xuz xtó'oli', gula'nnë' dxi'a quégaquië' bönni' gula'zí' yë'ë,

gula'nně' nácagaquiě' bönni' tu'ě didza' uláz queě' Dios.

Ral-la' idxí'iru' nupa biti' ta'lé'e rě'u dxi'a
(Mt. 5:38-48; 7:12)

²⁷ Gunně' ca' Jesús:

—Libí'ili' zóali' ni, en riyõnili' xtídza'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'.

²⁸ Guli'nabi Dios gaca dxi'a quégaca nupa tua' dö' queéli', en buli'lidzě' Dios inábili'-ně' gácaleně' nupa ta'nně' zi' queéli'.

²⁹ Channö nu capa' tsölá'a xagu', buzě ia'tsölá'a ca' xagu'. Channö nu cúa lari' naxóa cúdzu'u, bě' lataj cúa ca' zxo'.

³⁰ Núti'těs nu bi inaba le dě quiu', bunödzej que, ate' nu cúa le nequi quiu', biti' unabu' le.

³¹ Ca rě'ënili' ilún bönachi queéli', lěsca' caní guli'gún quéquequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lěsca' caní tuně' bönni' dul-la', ta'dxí'ině' nupa nadxí'iguequi légaquiě'.

³³ Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lěsca' caní tuně' bönni' dul-la'.

³⁴ Channö runödzejali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lěsca' caní tuně' bönni' dul-la', tu'nödzejě' quégaca nupa tun dul-la', tu' tuně' löza ulu'bí'i quégaquiě' lě na' bulu'nödzejě'.

³⁵ Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nödzej quégaca bönachi sal-la' biti' runli' löza nu ubí'i

queëli'. Channö caní gunli', zxön naca le gata' queëli', ate' gácali' xzí'ini cazë' Dios, Nu nácatëro lo, tu' runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dö'.

³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxe'ë yúgu'të bönachi.

Biti' ral-la' ichugu bë'ëru' que luzá'aru'

(Mt. 7:1-5)

³⁷ Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queëli'. Biti' cuéaj bë'ëli' que luzá'ali', ate' cuntu nu cuéaj bë' queëli'. Buli'niti lo luzá'ali', ate' Dios uniti lahuë' ca' libí'ili'.

³⁸ Buli'nödzej que luzá'ali', ate' Dios gunnë' queëli'. Ulu'nödzjé' queëli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queëli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'tué' bönni' lo chul-la? Biti' ca' gaca, tu' ila'bixë' iropë' tu lu yeru.

⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu'?

⁴² ¿Naru' huácatsö guío'-në' böchi' luzó'o: “Böcha'a, benna lataj cueja' bëbudo' yu'u guiöj lo”, en biti' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le

zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

Le runru' naca bë' le nácaru'
(Mt. 7:17-20; 12:34-35)

⁴³ Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a.

⁴⁴ Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva.

⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u
(Mt. 7:24-27)

⁴⁶ Gunnë' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bé'eda' libí'ili'?

⁴⁷ Ulu'ída' libí'ili' ca naca nu na' za' quia', en riyöni xtídza'a, en run ca rnna xtídza'a.

⁴⁸ Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiöj.

⁴⁹ Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dërö zö'ö que.

7

*Jesús ruúnë'-bi' bi'i huen dxin queë' tu bönni' unná
bë'*

(Mt. 8:5-13)

¹ Cate' Jesús budxi bë'lenë' légaquië' didza' ni, guyázië' yödzo Capernaum.

² Lu yödzo ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'.

³ Cate' biyönnë' bönni' ni didza' tu'ë bönachi ca naca queë' Jesús, la' gusöl-la'të' bal-lë' bönni' gula tu'zéajni'inë' bönni' judío ga na' zoë' Jesús, tsöjõta'yugaquië' lahuë' Lë' guidë' uduhuénë'-bi' bi'i huen dxin queë' na' ré'ebi'.

⁴ Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni,

⁵ tu' runë' bal bönachi uládz queëru', en benë' tu yu'u queëru' ga rudúbiru' rusédaru' queë' Dios.

⁶ Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusöl-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa',

⁷ en biti' naca' lesaca' guída' ga zu'. Que lë ni na' bití' burúguida' guída' ga zu'. Bë'ësö didza', ate' huöácatëbi' bi'i huen dxin quia'.

⁸ Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë':

Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

⁹ Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel biti' röjxáqui'da'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusöl-lë'ë bönni' rinná bé'enë' bönni' röjáquië' gudil-la, gula'yázië' ga naca lu yu'u lidxë', en bila'lé'enë' chiböácabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían.

¹² Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjçáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' sôjácalen-nu.

¹³ Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödXu'.

¹⁴ Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunnë':

—Bi'ido', li' rea', guyasa.

¹⁵ Ní'irö bubanbi'. Gurö'öbi' bi'i na' zí'alö nátibi', ate' gusí lobi' ruí'ibi' didza'. Jesús budödë'-bi' lu ná'anu xiná'abi'.

16 Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

17 Guzé didza' ca naca yöl-la' huáca queë' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.

*Le rinabë' Juan, bönni' buquile' bönachi nisa
(Mt. 11:2-19)*

18 Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guié, bulidzë' chopë' bönni' na' dá'gaquië' lë,

19 ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': “¿Nacu' Li' Cristo, bönni' ral-la' guidé', o naru' ral-la' cöztu'-në' bönni' yúbölö?”

20 Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquile' bönachi nisa, nasöl-lë'ë netu' para inábitu' Li', innatu': “¿Nacu' Li' Cristo, bönni' na' ral-la' guidé', o naru' ral-la' cöztu'-në' bönni' yúbölö?”

21 La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'.

22 Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóácagaquië' bönni' gü'iguequinë' huë' nudzu' ruzödi. Tu'yönnë' bönni' gula'cödzue'.

Nubángaquië' bönni' gulátië'. Ta'yönnë' bönni' yechi' didza' dxi'a.

²³ Bica' ba nu bití' gaca chopa ladxi', ate' za'len neda' sal-la' bití' runa' ca réqui nu na' ral-la' guna'.

²⁴ Cate' bönni' na' gusól-lë'ë Juan bulu'zë'ë ni', gusílahuë' Jesús ruluí'inë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu guí rutá bö' recja le?

²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu gaca lari' nazáca'de'e, en tu'zí' xibé yöl-la' tsahui', nacuá' lídxigaquië' bönni' ta'nná bë'ë.

²⁶ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayëpisëtë'rë' ca nu ruí'i didza' uláz queë' Dios.

²⁷ Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risöl-la'a-në' gubáz quia', inöruë' ca Li'. Bönni' ni uchi'ë nöza ga tödu'.

²⁸ 'Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, bití' nácarë' lo ca Juan, bönni' na' buquilé' bönachi nisa, pero nu nácatë'rö cuídi'sö ga rinná bë'ë Dios nayëpisëtë'rö ca Juan na'.

²⁹ Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilé' nisa lu në'ë Juan,

³⁰ pero yugu' bönni' yudo' fariseo, en bönni' yudo' tu'sedinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

³¹ Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácagaquië'?

³² Nácagaquië' ca bí'ido' ta'guítjabi'. Ta'bö'öbi' lu yë'ëyi, en ta'bödxí'abi'. Ta'nnabi' tubi' ia'tubi': "Rucödxitu' queëli' gui, pero biti' ruyá'ali'. Rul-la yéchi'tu', pero biti' ribödxili'."

³³ Caní nácali' tu' bidë' Juan, bönni' buquilë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': "Tu' xihui' dzaga lé'."

³⁴ Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë". Náquië' luzá'agaquië' bönni' tu'quizxjë', en ia'zica'rë' bönni' dul-la'."

³⁵ Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'.

³⁷ Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinu ni' nuá'anu tu böga'do' néquini guiöj nazaca' le yudzu tu le rilá' zxixi.

³⁸ Cate' bidxinu zaca' cúdzu'lë' Jesús, gurö'önu xini'ë ribödxinu. Ní'irö gusí lonu rigú'unu nisa ribödxinu ni'ë Jesús, en ruzxinu ni'ë len guitsa'

ícjanu. Butsaga lonu ni'ë, en gulú'unu ni'ë lë na' rilá' zixixi.

³⁹ Cate' bönni' yudo' fariseo na' nulidzë' Jesús bilé'enë' lë ni, guzá' lãdxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquiibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga."

⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'túë' na' ral-lë'ë queë' lazxjë' que chopa beo'.

⁴² Tu' cabí dë quégaquië' dumí ulu'guízxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rnno'.

⁴⁴ Ní'irö buécjë' Jesús, ate' ni' ruyüë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' bití' bennu' quia' nisa quívida' ni'a, pero nigula ni gulú'unu ni'a nisa ribödxinu, en buzxinu ni'a len guitsa' ícjanu.

45 Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a.

46 Biti' gulú'u icja' le za, pero nigula ni gulú'unu ni'a lë na' rilá' zxixi.

47 Que lë ni na' rea' li', dul-la' zián gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

48 Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

49 Yugu' bönni' na' ta'bö'lenë' Jesús tahuë' gula'sí lógaquië' tē' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

50 Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládXu'u.

8

Yugu' nigula tácalennu Jesús, ta'gú'unu le tahuë'

1 Gudödi gulaca lë ni, gudë' Jesús gapa nacua' zián yödzö zxön, en yugu' yödzödo', ate' benë' libán ni', en bē'ë didza' que didza' dxi'a ca rinná bē'ë Dios, ate' idxínnutë' bönni' usëda queë' dzágagaquië' Lë'.

2 Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugüë' yugu' yödzöhuë' gü'iguequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu.

3 Juana, nigula queë' Chuza, bönni' yu'u lu nē'ë le dë lidxë' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu.

Ta'gú'unu nigula ni, en ziánrönu ca', le tahuë Jesús, en yugu' bönni' usëda queë'. Tu'nödžjanu le dë quégacanu.

Rucúdzu'ë didza' Jesús ca naca queë' bönni' guz
(Mt. 13:1-9; Mr. 4:1-9)

⁴ Bila'rúaj bönachi zían yugu' yödžö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, sōjësië' xisedo'. Cate' ni' sōjësië', bulu'huöxaj bal-la xisedo' na' ga naca la' nöza, ate' bulu'libi bönachi léguequi. Bila'dxinba' ca' biguínido', en gulé'ajba' xisedo' na' dzö'ö la' nöza.

⁶ Bulu'huöxaj ia'bal-la xisedo' na' lu yu ga rö'ö guiöj. Cate' gula'lén xisedo' na', la' gula'bídxitë tu' cabí nalupa' yu na'.

⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxön lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi.

⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxön, bulu'nödžaj. Tu dxigu' na' bunödžaj ia' tú gayuá'tërö xisedo' ca'.

Cate' budxi gunné' caní Jesús, bë'ë zidžaj didza', rnnë':

—jNu zoa nagui, en riyöni ral-la' uzé nagui!

Bizx que rucúdzu'ë Jesús didza'
(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bē'ë Lē', pero ia'zica'rō bōnachi ni, ruí'ilena' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

Rigúxjö'ë Jesús le rulu'i le bucúdzu'ë didza'
(Mt. 13:18-23; Mr. 4:13-20)

¹¹ Gunnë' ca' Jesús:

—Caní naca le rulu'i lē na' bucúdzu'a didza'. Xisedo' na' naca xtídzë'ë Dios.

¹² Xisedo' na' bulu'huöxaj la' nöza tu'lu'i ca raca quégaca bönni' ta'yönnë' didza' na', pero la' za'tē tu' xihui', en rigúa didza' na' bidxín lu icja lādxi'do'gaquië', para cabí ila'yéajlë'ë, en cabí ulu'lë'.

¹³ Xisedo' na' bulu'huöxaj lu yu ga rō'ö guiöj tu'lu'i ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' bití' ben lui. Tu chí'sö ta'yéajlë'ë, tu' ridxín le rizi' bē' légaquië', ate' la' tu'huöatē lādxi'gaquië'.

¹⁴ Xisedo' na' bulu'huöxaj ga bulu'lén lubá yötsi' tu'lu'i ca raca quégaquië' bönni' ta'yönnë' didza' na', en cate' chibila'yönnë', yugu' le tu'i lādxi'gaquië' yödzölió ni, en yugu' yöl-la' tsahui' que, en yugu' le ta'yaza lādxi'gaquië' le taca ni, tun nigui légaquië', ate' bití' run dxin didza' na' lu icja lādxi'do'gaquië'.

¹⁵ Xisedo' na' bulu'huöxaj ga naca luyú bëbu tu'lu'i ca raca quégaquië' bönni', idú lādxi'gaquië' ta'yönnë' didza' na', en ta'gu'ë tsutsu le lu icja lādxi'do'gaquië', ate' lu yöl-la' riböza zxön lādxi' tunë' ca rna didza' na'.

Rucúdzu'ë didza' Jesús que le rigú'u bení' lídxiru'
(Mt. 4:21-25)

¹⁶ Gunně' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en bití' rigú'ë le zxani le ráti'ně', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'.

¹⁷ Ilá' lahui yúgu'të le nagachi', ate' gaca bē', ate' irúaj ga liná' yúgu'të le raca balándo'os.

¹⁸ 'Que lë ni na', buli'zë nágali', tu' huadéli'ně' ia'lati' bönni' ruzóë' tsutsu icja ládxi'da'ahuë' didza' riyönně', en huazi'rë' xtídzë'ë Dios, pero bönni' bití' ruzóë' tsutsu icja ládxi'da'ahuë' didza' riyönně', huadúa didza' na' biyönně'.

Xinë'ë Jesús, en yugu' bönni' böchë'ë
(Mt. 12:46-50; Mr. 3:31-35)

¹⁹ Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero bití' guca ila'bíguë'ë gala' ga zoë' tu' nacuá' bönachi zián ni'.

²⁰ Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' ilu'ílenë' Li' didza'.

²¹ Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácaqaquië' ca xiná' caza', en yugu' bönni' böchi' caza'.

Jesús ribequi dxíë' bö' budunu'
(Mt. 8:23-27; Mr. 4:35-41)

²² Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö sòjácate'.

²³ Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huõtaj bárcodo' na' zxan nisa, en zoa bönadxi quégaquië'.

²⁴ Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huõtjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxiada', ate' guzóa dxi bö' na' recja, en gurö'ö dxi lu nísado' na'.

²⁵ Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulë luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzo Gadara yu'u lë' bö' xihui'

(Mt. 8:28-34; Mr. 5:1-20)

²⁶ Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea.

²⁷ Cate' birúajë' Jesús lë'e bárcodo' na' ga naca lu yu na', dutságuie' tu bönni' yödzo na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxan bulóaj ga nádjagaca yeru ba.

²⁸ Cate' bönni' na' yu'u bö' xihui' lë' bilé'enë' Jesús, gurödxí'ë zidzaj, ate' buzóa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayépisëtërë'? Ráta'yua' lo' cabí usaca' zi'u neda'.

29 Caní gunnë' tu' chigunná bé'enë' Jesús bö' xihui' na' urúaj lu bönni' na'. Zián luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúguí'ë lë' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lë' guchë' lë' lu lataj cá'asö.

30 Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'.

31 Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca.

32 Nacuá'aba' ca' tu cö'öba' cuchí zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchí zián na'. Jesús bë'ë léguequi lataj.

33 Bulu'rúaj yugu' bö' xihui' lu bönni' na', en yöjtsú'ugaca cuchí zián na', ate' yöjácaba' cuchí zián na' ga naca tu lë'e guíöj. Yöjbíxigacaba' lu nísado', ate' ni' gula'yépiba' nisa, gulátiba'.

34 Cate' bila'lé'enë' bönni' tu'yúgaquië'-ba' cuchí zián na' ca na' guca quégacaba', guladxi gula'dzöbinë'. Bulu'zxúnnajë' ni', ate' yöjhuöjgaquië' yöjtíxjöi'iguequinë' nupa nacué' yödzö na', en nupa nacué' la' guixi' ni'.

35 Ní'irö bila'rúajë' bönni' yödzö na', yöjyúgaquië' lë' na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë

xini'ë Jesús. Nácuë' lari', en dxí'ado' chizóë', ate' guládxinë'.

³⁶ Nupa na' bila'lé'e lë na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lë'.

³⁷ Ní'irö yúgu'të bönachi zián na' quégaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuöjë'.

³⁸ Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë' ni', rnnë':

³⁹ —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

Jesús ruínë'-bi' bi'i nigula queë' Jairo enca' nigula na' gudannu lari' nácuë'

(Mt. 9:18-26; Mr. 5:21-43)

⁴⁰ Cate' budxinë' Jesús ia'tsölá'a nísado' na', bulu'dzeja bönachi zián nacuá' ni' ni'a queë' Lë', tu' ta'böza Lë'.

⁴¹ Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sedë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'.

⁴² Caní benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirö bönachi zián Lë'.

⁴³ Nútsa'nu tu nigula ladaj bönachi zián na', chiguca chinnu iz riguí'i rizáca'nu. Biti' ruhuí'i

rön queënu que huë' quégaca cázanu nigula, ate' chibutönu dëra le dë queënu, riguízxjanu nupa tu'ún bönachi, pero biti' guca nu bönni' únë'-nu.

⁴⁴ Gubíga'nu zaca' cúdzu'lë' Jesús, en gudannu ru'í lari' nácuë', ate' la' bu'itë huë' rön queënu.

⁴⁵ Ní'irö Jesús gunábinë' nupa nacua' ni', rnnë':
—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacua'len lë' gulë' Lë', ta'nnë':

—Bönni' Usedi, nacua' bönachi zían ni, tu'quirö Li', en tu'dxiga' Li', ate' ¿rnnatso': “¿Nuzxi na' gudán neda'?”

⁴⁶ Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjöi'ínu Lë' lógaca bönachi zían na' bizx que na' gudannu lari' nácuë', en ca na' guca, la' böácatënu.

⁴⁸ Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládXu'u.

⁴⁹ Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sedë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upízxjanu'në' Bönni' Usedi.

⁵⁰ Cate' biyönnë' Jesús lë ni, bubí'ë didza', rë bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

⁵¹ Cate' guyázië' Jesús yu'u na', bití' bē'ë lataj nu tsázalen Lē', pero légacasē' Pedro, en Jacobo, en Juan, enca' xuz xiná'abi' nigúlado' na'.

⁵² Ta'bödxi nupa nacuá' ni'. Ta'bödxi yechē'ë ni'a queēbi' bi'i nigúlado' na', ate' Jesús rē' légaquiē', rnnē':

—Bití'rō cödxi'. Bití' nátibi' nigúlado' ni. Rásisibi'.

⁵³ Bulu'titjē' Lē' tu' nōzguequinē' chinátibi'.

⁵⁴ Ní'irō gudélē'ë Jesús ná'abi', en bē'ë zidzaj didza', rnnē':

—Bi'i nigúlado', guyaschi.

⁵⁵ Ní'irō bu'u bö' naca cázabi', bubanbi', ate' la' guyásatēbi'. Jesús gunná bé'enē' légaquiē' ilu'ë le gágubi'.

⁵⁶ Bulu'báninē' xuz xiná'abi', pero Jesús gunná bé'enē' légaquiē' cuntu nu ilē' ca na' guca.

9

Risöl-lē'ë Jesús bönni' usēda queē' tsōjéngaquiē' libán

(Mt. 10:5-15; Mr. 6:7-13)

¹ Ní'irō butubē' Jesús idxínnutē' bönni' usēda queē', ate' budödē' lu ná'agaquiē' yöl-la' huáca, en yöl-la' unná bē' para ulu'béajē' bö' xihui' yú'ugaca bönachi, en ulu'únē' nupa te'e.

² Gusöl-lē'ë légaquiē' tsōjéngaquiē' libán ca rinná bē'ë Dios, en tsōjhuéngaquiē' nupa te'e.

³ Jesús gudxē' légaquiē':

—Bití' bi guá'ali' para la' nōza, calēga xiyágado', en calēga yōxaj, en calēga yōta, en calēga dumí, en bití' ixóa yenli' chopa lari'.

4 Bítí'tës yu'u ga tsú'uli', guli'sóa ni' cate' uzá'aröli' yödzo na'.

5 Gátí'tës ga bití' ilún bönachi libí'ili' bal, buli'rúaj yödzo na', en guli'cuíbi bëchtö da' lë'e lábali', le uluí' légaquië' nagá'ana xíguia' nabága'gaquië'.

6 Ní'irö bila'rúajë' bönni' usëda queë' na'. Gula'dödë' yúgu'të yödzo'do', tunë' libán que didza' dxi'a, en tu'únë' nupa te'e yúgu'të lu yödzo na'.

Ca gútië' Juan, bönni' buquilë' bönachi nisa
(Mt. 14:1-12; Mr. 6:14-29)

7 Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

8 Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

9 Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi
(Mt. 14:13-21; Mr. 6:30-44; Jn. 6:1-14)

10 Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzo Betsaída.

11 Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bé'lenë'

léguequi didza' ca rinná bē'ē Dios, ate' bunē' nupa te'e.

¹² Cate' chizá' ral-la dza na', idxínnutē' bōnni' gubáz queē' Jesús gula'bíguē'ē ga zoē', en tē' Lē':

—Busöl-la' bōnachi ni tsōjaca gapa dē yōdzōdo', en gapa dē yú'udo' idú gásibi'ilō para tsōjtíljagaquiē' gapa ulu'gá'anē', en bi ilahuē', tu' naca lataj cá'asō ga ni zóaru'.

¹³ Ní'irō Jesús rē' légaquiē':

—Guli'gu'ē libí'ili' le ilahuē'.

Tē' Lē':

—Gáyu'sō yōta xtílado' dē, en chópasōba' bōla dēba' queētu', o ¿naru' huayéajtsatu' tsōjō'ōutu' le ilágugaca bōnachi zían ni?

¹⁴ Nacu'ē ca chi-un gáyu'ē bōnni' ga na'. Ní'irō Jesús gudxē' yugu' bōnni' usēda queē', rnnē':

—Guli'gún ga ila'bō'ē tu cō' huéajgaquiē', ilaca ca chi-un huéajgaquiē'.

¹⁵ Caní gulunē', ate' gula'bō'ē yúgu'tē'.

¹⁶ Ní'irō gudélē'ē Jesús gayu' yōta xtila na', en chópaba' bōla na', ate' guchisa lahuē' ruyúē' lúzxiba, en rē' Dios: “Xclenu'.” Ní'irō buzxuzxjē' léguequi, en bē'ē quégaquiē' bōnni' usēda queē' para ulu'cu'ē lógaca bōnachi na'.

¹⁷ Gulahuē' yúgu'tē', en bulu'huóljanē'. Gudōdi na' bulu'tubē' yugu' bizxaj bugá'ana, ate' bulu'lié' idú chinnu ga'bōra.

Rnnē' Pedro Jesús náquiē' Cristo

(Mt. 16:13-19; Mr. 8:27-29)

¹⁸ Tu dza tsanni ni' zoē' quez Jesús, rulidzē' Dios, bila'dxinē' bōnni' usēda queē' ga zoē', ate' gunábinē' légaquiē', rnnē':

—¿Nuzxi ta'nná bōnachi naca' neda'?

19 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquile' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bitsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

20 Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasól-lë'ë Dios.

Riguúxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

21 Ní'irö Jesús gúdxidë'ë légaquië', en gunná bé'enë' légaquië' cuntu nu ilë' Nu náquië' Lë'.

22 Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

23 Gudxë' ca' yúgu'të':

—Channö rë'ënë' nu bönni' të'ë neda', ral-la' uzóë' tsölá'alö le dë queë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö gaca të'ë neda'.

24 Núti'tës bönni' ruí'i ládxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'.

25 Biti' bi uzi'ë xibé tu bönni' channö utubë' queë' yúgu'të le dë yödzülió ni, pero unítië' tsaz yöl-la' na'bán queë'.

²⁶ Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljé' Bönachi, utuí'ida' bönni' na' cate' huöda' idinná' bē'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios.

²⁷ Le nácatë rea' libí'ili', nacué' bal-lë' bönni' ni bití' ilátië' cate' ila'lé'erönë' dza idinná' bē'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bē'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios.

²⁹ Tsanni ni' ruí'ilenë' Dios didza', bidzá' ca riná' lahuë', ate' böáca chiguí'chido'os lari' nácuë', en guyëpi yösa bení'.

³⁰ Ní'irö bulu'luí'i lógaquië' chopë' bönni' ga zoë' Lë' tuí'ilenë' Lë' didza'. Nácagaquië' Moisés, en Elías.

³¹ Chopë' ni gula'yëpë' yösa bení', ate' tuí'ilenë' Jesús didza' ca si' uzé'ë yödzölió ni, gátië' lu yödzö Jerusalén.

³² Sal-la' chirácada' ilásië' Pedro, en nupa nacué'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacué'lenë' Lë'.

³³ Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Bití' réquibe'enë' Pedro bi na' rnnë'.

34 Tsanni ni' ru'ë didza' ni, la' gur'ötë böaj le bugacu légaquië', ate' guládxinë' tu' nacu'ë lu böaj na'.

35 Ní'irö biyön chi'i Nu ru'i didza' lu böaj na', rna:

—Bönni' ni náquië' Zxi'ina'. Nadxi'ida' Lë'. Buli'zë nágali' didza' gu'ë.

36 Cate' budxi bë' didza' chi'i na', tuzë' Jesús nagá'analënë' légaquië'. Ta'cuá' dxíë' bönni' usëda queë', ate' dza na' cuntu nu gulë' ca naca le bila'lé'enë'.

Ruúnë' Jesús bi'i bönni' yu'u bö' xihui' läbi'
(Mt. 17:14-21; Mr. 9:14-29)

37 Cate' za' reni' ia'tú dza bulu'huötjë' Jesús, en bönni' na' dzágagaquië' Lë' lu gu'ado' na', ate' bila'rúaj bönachi zían dutságagaca Jesús.

38 Ní'irö bë'ë zidzaj didza' tu bönni' nütse'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'.

39 Yu'u bö' xihui' läbi' le run ga ribödxí'abi', en ruxízida' läbi'. Run ga ribía bidxina' zxöna' ruá'abi', en rurixi rutúluda' läbi', ate' catu caz rusán läbi'.

40 Gúta'yua' lógaquië' bönni' usëda quiu' ulu'béajë' le, pero biti' gula'zéqui'në'.

41 Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queëli'? Dijúa'a-bi' bi'i bönni' quiu' ni.

42 Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' läbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'.

⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'
(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë',
⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabi ru'inië' Dios légaquië' lataj ila'yéajni'inë', pero bití' bulu'rúguinë' ila'nábinë' Jesús ca naca didza' ni.

Nu naca lo
(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'tué' núzxilë' gáquië' lo.

⁴⁷ Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'.

⁴⁸ Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöl-lë'ë neda'. Que lë ni na' bönni' nútsë'ë ladjali' nácarë' nöxaj ladxi', bönni' ni náquië' lo.

Nu bití' ridá'baga' rë'u, rácalen rë'u
(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

50 Jesús rē' lē':

—Biti' inná bé'eli'-nē', tu' rácalen rē'u nu bití' ridá'baga' rē'u.

Jesús ridil-lē' Jacobo, en Juan

51 Cate' chizá' gal-la' dza ral-la' gátiē' Jesús, en huēpē' yehua' yubá, benē' bayudxi tsejē' Jerusalén.

52 Gusöl-lē'ē yugu' bönni' gubáz queē' ila'nōruē' ca Lē', ate' yōjáquiē' tu yōdzōdo' quégaca bōnachi Samaria para tsōjpa'agaquiē' ga ugá'anē' Jesús tu yēla.

53 Yugu' bönni' yōdzō na' bití' gulunē' Jesús bal tu' chinaca queē' sa'yéajē' Jerusalén.

54 Cate' Jacobo, en Juan, bönni' usēda queē' Jesús, bila'lé'enē' lē ni, tē' Lē':

—Xan, ¿naru' inábatsōca'tu' huötaj guí' le za' yehua' yubá, en usuniti légaquiē', guntu' ca na' benē' Elías?

55 Buécjē' Jesús, en gudil-lē' légaquiē', rnnē':

—Biti' nōzili' bizxi bö' dzágui libí'ili'.

56 Bida' ni neda', Bönni' Guljē' Bōnachi, calēga para usunítia' yöl-la' na'bán quégaca bōnachi, pero bida' dusölá' bōnachi.

Ní'irō yōjáquiē' yōdzō yúbölö.

Nupa tē'ēni tsōjácalen Jesús

(Mt. 8:19-22)

57 Tsanni ni' yú'ugaquiē' nōza Jesús, en yugu' bönni' dá'gaquiē' Lē', bidxinē' tu bönni' yōdzō Jerusalén, en rē' Jesús:

—Xan, rē'ēnda' sá'lena' Li' gáti'tēs ga tseju'.

58 Jesús rē' lē':

—Yúgu' böza', nacuá' zzan bulóaj quégacaba', ate' biguínido', dxíagaca xcá'agacaba', pero neda',

Bönni' Guljē' Bönachi, biti' dē quia' ga gáta'a uzí ládxa'a.

⁵⁹ Ní'irō Jesús gudxē' tu bönni' yúbölö, rnnē':

—Gudá' neda'.

Bönni' ni gudxē' Lē':

—Xan, benna neda' lataj huöja' lidxa' ga idxinrö dza chibucácha'a-nē' xuzá'.

⁶⁰ Jesús gudxē' lē':

—Bē' lataj bönni' chizóa ilátie' ulu'cáché'ē nupa chinati quégaquiē', pero lí', guyéaj, yójén libán ca inná bē'ē Dios.

⁶¹ Ní'irō bidxinē' ia'túé' ca', en rē' Jesús:

—Xan, rē'ēnda' sá'lēna' Lí', pero benna neda' lataj tseja' tsöjzégacada'-nē' didza' di'a dza quia'.

⁶² Jesús gudxē' lē':

—Núti'tēs bönni' ruí'i ládxe'ē le raca yödzülió náquiē' ca tu bönni' rugá'anē'-ba' bēdxi, en ruyúē' zaca' cúdzu'lē'. Nu run caní biti' naca lesaca' tsaza ga rinná bē'ē Dios.

10

Risöl-lē'ē Jesús tsónnalaj yu' chiē' bönni' tsöjéngaquiē' libán

¹ Gudödi gulaca yugu' lē ni, guröē' Xanru' ia'tsónnalaj yu' chiē' bönni' usēda queē', ate' gusöl-lē'ē légaquiē' chopa huéajgaquiē' para ila'nörüē' ca Lē', en tsöjáquiē' yúgu'tē yödzö, en yödzödo' gapa chizóa tödē' Lē'.

² Gudxē' légaquiē':

—Le nácatē, dēda' dxin quia', le naca ca tu la'yēla zxön ga nu tsöjlapa', pero nabábasö huen dxin quia' nacué'. Que lē ni na', guli'gáta'yu lahuē' Dios,

náquië' Xan la' yëla na', isöl-lë'ë yugu' huen dxin ga naca la' yëla queë'.

³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' sōjácaba' lād'jagacaba' bö'cu' gu'a sínia'.

⁴ Biti' guá'ali' yōxaj dumí, en calëga buzudi yōta, en biti' guá'ali' ia'tú cō' xiráchuli', en biti' tseli' para gü'ilenli' bōnachi didza' gapa naca la' nōza.

⁵ Gátitës yu'u ga tsú'uli', innali': "Le ribequi dxi ladxi' gaca quégaca bōnachi nacúa' yu'u ni."

⁶ Channō zoa ni' nu bōnni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channō cabí zoa ni' nu bōnni' caní, ugá'analen libí'ili' le ribequi dxi ladxi' na' inábali'.

⁷ Guli'gá'ana yu'u ga na' tsú'uli', en guli'guí'aj guli'gagu bi ilunnë' queéli', tu' udzōli quézinë' bōnni' huen dxin le gahuë'. Biti' tōdili' yu'u yu'u.

⁸ Gátitës yōdzō ga tsú'uli', ate' ilún libí'ili' bal, guli'gagu le ulu'cu'ë loli'.

⁹ Buli'ún nupa te'e nacúa' yōdzō na', en guli'guíë léguequi: "Chibidxín le rinná bë'ë Dios ga zóali'."

¹⁰ Gátitës yōdzō ga tsú'uli', channō cabí ilún libí'ili' bal, guli'rúaj, tsōjsóali' la' nōza que yōdzō na', en innali':

¹¹ "Bëchtō que lād'zali' le da' lë'e lābatu' ruquínajtu', le rulu'í nabága'li' xíguia', pero ral-la' inózili' lë ni, chibidxín le rinná bë'ë Dios ga zóali'."

¹² Neda' rea' libí'ili', cate' idxín dza ichúguië' Dios quégaca bōnachi, ila'guí'ila'zaca'rō bōnachi yōdzō ni' ca ila'guí'ila'zaca' bōnachi yōdzō Sodoma, nupa ni' busunítie' Dios.

*Le gaca quégaca nupa biti' ulu'bí'i ládxi' gaca
(Mt. 11:20-24)*

¹³ Gunně' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxi'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'ígaca chibulu'bí'i ládxi'gaquië'.

¹⁴ Que lë ni na', cate' idxín dza ichúguië' Dios quégaca bönachi, quí'i sáca'röli' ca ila'guí'i ila'záquië' bönni' yödz Tiro, en yödz Sidón.

¹⁵ Libí'ili', bönachi Capernaum. Réquili' tsázali' yehua' yubá. Huötjali' tsöjtsázali' lataj chul-la quégaca nupa nátigaca.

¹⁶ Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasól-lë'ë neda'.

Bönni' yöjéngaquië' libán tu'dxinë' ga zoë' Jesús

¹⁷ Cate' tsónnalalaj yu' chië' bönni' na' gusól-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.

¹⁹ Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en

xöjnǒ', en bití' bi gaca queéli', ate' ucúl-lali' yöl-la' unná' bē' que tu' xihui', nu bití' rilé'e rē'u dxi'a.

²⁰ Na'a, buli'dzeja, calégasō tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanē' Jesús

(Mt. 11:25-27; 13:16-17)

²¹ La' ní'sō rudzéjanē' Jesús, dzáguiē' Dios Bö' Lá'ayi Lē', rnnē':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lē ni lógaquiē' bönni' táquiē' yenni', en bönni' ta'yéajni'inē', pero bulu'iguetquinu'-bi' bí'ido' ca naca. ¡Ca' gaca, Xuza', tu' caní' guyaza ládxi'u!

²² Ní'irō gunnē':

—Yúgu'tē budödē' Xuza' lu na'a. Cuntu nu bönni' nōzinē' Nu náquiē' Zxi'inē' Dios, pero tuzē' Dios Xuz nōzinē', ate' cuntu nu nōzi Nu náquiē' Dios Xuz, pero tuzē' Zxi'inē' nōzinē', ate' inōzigaca ca' nupa na' Zxi'inē' rē'ēnē' ulu'inē' léguequi Xuzē'.

²³ Ní'irō Jesús buyué' yugu' bönni' usēda queē', en rē' légaquiē':

—Bica' bágaca nupa ta'lé'e le rilé'eli' libí'ili',

²⁴ tu' rea' libí'ili': Zián bönni' gulu'ē didza' uláz queē' Dios, enca' bönni' gula'nná bē'ē, gulé'ēnnē' ila'lé'enē' le rilé'eli', pero bití' bila'lé'enē' le. Gulé'ēnnē' ila'yōnnē' le riyōnili', pero bití' bila'yōnnē' le.

Tu bönni' Samaria, bönni' tsahui'

²⁵ Ní'irō guyasē' tu bönni' yudo' usedi, en para si' bē'ē Jesús, gunábinē' Lē', rnnē':

—Bönni' Usedi, ¿bizxi ral-la' guna' para idéli'da' yöl-la' na'bán idú?

26 Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

27 Bubi'ë didza' bönni' na', rnnë':

—Caní rna: "Idxí'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxí'inu' bönni' luzó'o ca nadxí'i cuinu'."

28 Jesús rë' lë':

—Dxi'ado' bubi'u didza'. Ben caní, ate' gata' quiu' yöl-la' na'bán na'.

29 Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

30 Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'güë' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'.

31 Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'.

32 Gudödë' ca' ni' tu bönni' nababë' zxí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'.

33 Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxi'ë lë'.

34 Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxië' lë' cúdu'ba' böa' queë', en bu'ë lë'

yu'u ga ta'dxinë' bönni' yú'ugaquië' nöza, ate' ni' gudapa chi'ë lë'.

35 Cate' za' reni' ia'tú dza, en chizóa uzë'ë bönni' Samaria na', guléajë' láxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'."

36 Na'a, ¿nacxi runi li'? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

37 Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

38 Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu.

39 Marta ni zóanu nigula zxílanu lënu María, ate' María na' gurö'ötënu ga naca xini'ë Jesús, en ruzë náganu xtídzë'ë.

40 Marta na' bubi buguí'inu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxitso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

41 Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxu'u runu'.

42 Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' biti' udúa queëbi'.

11

Ca ral-la' ulídzaru'-në' Dios (Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'íilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios gü'íilenli'-në' didza', guli'ná:

Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládzu'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': “Böcha'a, benna quia' tsonna yöta xtila

⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'.”

⁷ ¿Naru' ubi'ë didza' caní bönni' na' zoë' yu'u, guié' lë': “Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu”?

⁸ Neda' rea' libí'ili': Sal-la' biti' chasë' bi unödzejë' queë' tu' náquië' böchi' luzë'ë, pero chasë', en unödzejë' queë' idutë le riquinnë' para cabirö upízxjanë' lë'.

⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'.

¹⁰ Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoë' nu bönni' ladjali', en náquië' xuz, ate' channö xzí'inë' inábibi' lë' yöta xtila, ¿naru' unödzejatsë' queëbi' guiöj? Channö inábibi' lë' tuba' böla, ¿naru' unödzejatsë' queëbi' bëla?

¹² Channö inábibi' lë' dxita que böra, ¿naru' unödzejatsë' queëbi' xöjnö'?

¹³ Caní naca, nácali' libí'ili' huiá' dö', pero nözili' unödzejali' quégacabi' xzí'inili' le naca dxi'a. Nácatëro löza Xúzili' zoë' yehua' yubá gunnë' queëli' Dios Bö' Lá'ayi, nülöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacué' ni'.

¹⁵ Bal-la bönachi nacué' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la bönachi na' gulë'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá.

17 Réquibe'enë' Jesús le ta'zá' ládxi'gaquië', ate' rë légaquië':

—Gáti'tës ga ta'nná be'e bönachi luzë'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacuá' tu yu'u, údxi quéguequi.

18 Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'?

19 Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'.

20 Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

21 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'.

22 Na'a, channö zë'ë ia'túë' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxi'ë, ate' quísië' le dë queë' bönni' na'.

23 'Nu bití' rácalen neda', ridá'baga' neda'. Nu bití' rutúbilen neda', rusilasi nu na'.

Ca naca que bö' xihui' rudxín xilataj

(Mt. 12:43-45)

24 Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguila'j ga uzí' ládxi'. Channö cabí idzöli que, inná: "Huöja' xilatja' ga ni' birúaja'."

25 Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'.

26 Ní'irö reag, en röjxí' ia'gadxi bö' xihui', nácacagatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idú

27 Tsanni ni' ru'ë Jesús didza' ni, tu nigula nútsa'nu ladaj bönachi zián na' bë'ënu zidzaj didza', rnnanu:

—Bica' ba nigula na' biá'anu Li' lé'ënu, en bica' ba ca' luchú'unu ga na' gúdxu'u.

28 Bubi'ë didza' Jesús, gunné':

—Nácacagatërö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'
(Mt. 12:38-42; Mr. 8:12)

29 Tsanni ni' ta'biga' bönachi zián ga zoë' Jesús, gúsí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'.

30 Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a.

31 Cate' idxín dza ichúguië' Dios quégaca bönachi ila'guí'i ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gu-bidza beo' ziaga, ate' le bennu uluí'i nabága'gaca

bönachi ni xíguia', tu' bídanu lënu, birúajnu ga naca zi'tu' para uduzë náganu didza' réajni'i bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'.

³² Lësca' caní, Dios uchisë' bönni' gula'cu'ë yödzö Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' ulu'i nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', bití' rigú'u le ga n-gachi', en bití' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'.

³⁴ Guiøj loru' naca ca tu le rigú'u bení' lu icja ládxi'do'oru'. Channö guiøj lo' naca dxi'a, idúteo' yudzu le naca bení', pero channö naca xihui' guiøj lo', idúteo' yudzu le naca chul-la.

³⁵ Ben chi'i cuinu' na'a, para cabí huöáca chul-la lë na' rigú'u bení' lu icja ládxi'do'o.

³⁶ Caní naca, channö idúteo' nalísinu' le naca bení', en bití' bi zóalen li' le chul-la, yúgu'të ilé'enu' dxi'a ca raca cate' ruzení' quiu' guí'.

Jesús ruzéqui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bē'ē didza' ni Jesús, tu bōnni' yudo' fariseo bulidzē' Lē' para tsōjtágulenē' lē'. Cate' guyáziē' Jesús lidxē' bōnni' yudo' na', gurō'ē rahuē'.

³⁸ Cate' bōnni' yudo' fariseo na' bilé'enē' Lē', bubáninē' tu' cabí gudibi nē'ē Jesús cate' si' gahuē'.

³⁹ Xanru' rē' lē':

—Libí'ili', bōnni' yudo' fariseo, riguibi cuinli' ca riguibili' láhuilögaca le rē'aji ráhuili', pero lu icja lādxi'do'oli' ruhuídi'li', en rizá' lādxi'li' le ruá' dō'.

⁴⁰ Libí'ili', bōnni' bití' réajni'ili'. ¿Naru' cabí nōzili', Nu ben le zoa láhuisō ben ca' le yu'u lē'elō'?

⁴¹ Na'a, guli'gún gun le dē queēli', ate' ní'irō huōáca dxi'a yúgu'tē le dē queēli'.

⁴² 'Bica' bayechi' libí'ili', bōnni' yudo' fariseo. Riguíxjali' que yudo' tu cō' huéaj tu' chi cō' le rizí'ili' que xōhuéaj, en que guixi' ruda, en quégaca guixi' cuando', pero rudōdisili' le naca tsahui', en yōl-la' nadx'i queēli' Dios. Yugu' lē ni run bayudxi gunli', en bití' ucá'anali' ia'zica' lē na' runli'.

⁴³ 'Bica' bayechi' libí'ili', bōnni' yudo' fariseo. Rē'ēnili' cō'ōli' gapa naca lo lu yu'u ga rudúbili' rusēdali' queē' Dios, en rē'ēnili' ulu'lidza bōnachi libí'ili' ba zxōn gapa naca láhuilöguequi bōnachi.

⁴⁴ 'Bica' bayechi' libí'ili', bōnni' yudo' usedi, enca' libí'ili', bōnni' yudo' fariseo, bōnni' rulu'isō tsahui' cuinli', tu' nácali' ca nácagaca yeru ba quégaca nupa nátigaca le cabí nalá'gaca, ate' ta'dá bōnachi láhuigaca yeru ba na', en bití' téquibe'e.

⁴⁵ Ní'irō bubí'ē didza' tu bōnni' yudo' usedi raquiē' xibá queē' Moisés. Rē' Jesús:

—Bōnni' Usedi, cate' rnno' caní, netu' ca' runu' zí'.

⁴⁶ Jesús rē' lē':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' calëga láti'do'os biti' ruláhui'li' le len ná'ali'.

47 'Bica' bayechi' libí'ili', tu' richísali' biqitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'.

48 Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biqitaj quégaca ba ga nagáchi'gaquië'.

49 'Que lë ni na', lu yöl-la' réajni'i queë', Dios gunné' caní: "Isöl-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'."

50 Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzölió,

51 ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bu-cugu lá'ayi ga na' tu' zégui'gaquië'-ba' böa' bëdxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

52 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxí'ini guié que lataj ga ta'dzöli bönachi

yöl-la' réajni'i. Libí'ili' biti' riyázali', ate' ruzága'li' xinözigaca nupa té'ëni ila'yaza.

⁵³ Cate' Jesús budxi bé'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zián le taca,

⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

¹ La' dza na' bulu'dubi zián gayuá' bönachi ga zoë' Jesús ga bidxintë ta'rölisö luzé'eguequi bönachi na'. Ní'rö gusí lahuë' Jesús rë' yugu' bönni' usëda queë cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'.

² Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'.

³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bé'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'

(Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi.

⁵ Ulu'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu nē'ë yöl-la' unná bē' chū'unē' libí'ili' lu guí' gabila. Ön, rea' libí'ili', guli'gadxi Nu na'.

⁶ 'Túti'gaquiē'-ba' gáyu'ba' biguínido' len chopa dumí lásido'. Biti' ral-la ládxe'ë-ba' Dios tu biguínido' na'.

⁷ Lësca' caní, yúgu'të guitsa' ícjalí' nabábagaca lahuē' Dios. Que lë ni na', bití' gádxili'. Nazáca'tëröli' libí'ili' ca zianba' biguínido'.

*Nupa ta'nnasö néquiquequi queë' Jesús
(Mt. 10:32-33; 12:32; 10:19-20)*

⁸ Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios,

⁹ ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

¹⁰ 'Yúgu'të nupa bi ila'nnë' quia' neda', Bönni' Guljë' Bönachi, gaca uniti lahuë' Dios léguequi, pero nu innë' zí' queë' Dios Bö' Lá'ayi, bití' uniti lahuë' Dios nu na'.

¹¹ 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sedë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'.

¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në Dios

13 Tu bönni' nútsë'ë ladaj bönachi zián na' rë Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

14 Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queë'li'?

15 Ní'irö Jesús gudxë' bönachi nacua' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' bití' nácasö le zián le dë queë'.

16 Ní'irö Jesús bé'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödizada' gulapa lu xiyüë'.

17 Ní'irö guzá' ládxe'ë bönni' na', rnnë': “¿Nacxi guntsa'? Bití' dë ga gapa chi'a le rulá' quia'.”

18 Ní'irö rnnë': “Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntëro ca', ate' gapa chi'a le rulá' quia' ni', len yugu' le dë quia'.

19 Ní'irö gaca guíë cuina': Chidéda' quia' zián le chinutuba', le gáhuida' zián iz. Uzí' ládxa'a. Guí'aj gahua', en udzëjada'.”

20 Ní'irö Dios rë' lë': “Li', bönni' bití' bi nözinë'. Na'a dzö' gátíu'. Na'a, ¿nuzxi caz guequi que, lë na' chinutubu'?”

21 Caní raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

22 Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'.

23 Nácarö lesaca' yöl-la' na'bán queëli' ca le ráguli', ate' nácarö lesaca' idú le nácali' ca lari' ráculi'.

24 Buli'yutëz ca raca quégacaba' boíquiaj. Biti' tázaba', en biti' ta'lápaba', en biti' nacua' quégacaba' ga ilún chí'iba' le rulá' quégacaba', pero Dios rugahuë' légacaba'. ¿Naru' cabí nazáca'tëröli' libí'ili' ca yugu' biguínido'?

25 ¿Nuzxi caz bönni' ladjali' gaca gunë' ga soë' ibanë' ia'tú chí'ido'os tu' ruúbi ruguí' ládxi'da'ahuë'?

26 Que lë ni na', channö cabí gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxöntëro'?

27 'Buli'yutëz ca ta'zxön yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'.

28 Channö Dios runë' lachi yöj guíxi'do' ró'gaca na'a la' guixi', ate' cuxö huidzaj ila'gu'ë léguequi lu guí', ¿naru' cabí gunë' le nácarö dxi'a queëli', libí'ili' na' biti' réajlë'ëli' Dios idú ládxi'li'?

29 Que lë ni na', biti' güi' ládxi'li' le ral-la' gáguli', en le ral-la' guí'jali', en biti' ubi uguí' ládxi'do'oli'.

30 Yúgu'të lë ni ta'guilaj bönachi yödzölió ni, pero chinöz quézinë' Xúzili' Dios le riquínili'.

³¹ Guli'güf' ládxi'li' tsú'uli' ga rinná bē'ē Dios, ate' yúgu'tē lē ni cu'ē xinōza queēli'.

Yöl-la' tsahui' rigú'uru' yehua' yubá
(Mt. 6:19-21)

³² Gunnē' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxi'ē Xúzili' Dios gunnē' queēli' lataj tsú'uli' ga ni' rinná bē'ē Lē'.

³³ Guli'guti' le dē queēli', en buli'nödzej quégaca bönachi yechi'. Caní gaca, gunli' queēli' yōxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinē' bönni' gubán, en bití' usunítiba' böa'do' le.

³⁴ Ga ni' dē yöl-la' tsahui' queēli', ni' güf'i ládxi'li' idxinli'.

Ral-la' sóaru' ban ladxi'

³⁵ Gunnē' ca' Jesús:

—Guli'sóa sina', en guli'quela' guí' le uzení' queēli'.

³⁶ Guli'gaca ca bönni' huen dxin ta'bözē' dza huödē' xángaquiē', bönni' sa'yéajē' laní que yöl-la' rutsaga na', para cate' udxinē', en ulidzē', la' ila'sálatē' queē' tsu'ē.

³⁷ Bica' bágaca huen dxin na' ila'cu'ē ban ladxi' cate' huödē' xángaquiē'. Le nácatē rea' libí'ili', upá'a cuinē' xángaquiē' na', ate' gunē' ga ila'bō'ē ga ilahuē', ate' cu'ē le ilahuē'.

³⁸ Sal-la' huödē' cate' chiral-la o idú guluhuēla, channō idixáquiē' légaquiē' nacu'ē ban ladxi', bica' bágaca huen dxin na'.

³⁹ Lë ni ral-la' inözili'. La'tu' nözinë' xan yu'u bizxi dza huadxinë' bönni' gubán, usubán ládxë'ë, en bití' gu'ë lataj bönni' na' udxíë' yeru lidxë', para cabí cuanë' le dzö'ö lidxë'.

⁴⁰ Que lë ni na', guli'sóa ban ladxi' ca' libí'ili', tu' huöda' neda', Bönni' Guljë' Bönachi, tu dza bití' ribözali' neda'.

Bönni' huen dxin tsahui', en bönni' huen dxin bití' náquië' tsahui'

(Mt. 24:45-51)

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönachi?

⁴² Rë' Xanru' lë':

—¿Nuzxi' na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queëgaquië' le ilahuë'.

⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë.

⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'.

⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zica'rë' huen dxin, bönni' en nigula, en isí lahuë' gu'aj gahuë', en súdxinë',

⁴⁶ ní'irö huödë' xanë' bönni' huen dxin na' cate' bití' ribözë' lë', en cate' bití' réquibe'enë', ate' usaca' zí'ë bönni' huen dxin bití' náquië' tsahui' na', en ichúguië' queë' qui'i sáquië' ca narugu quégaquië' bönni' bití' ta'yéajlë'ë.

47 'Bönni' huen dxin na' nözinë' le rë'ënë' xanë', en biti' zoë' sina', en biti' runë' ca rnnë' xanë', bönni' ni, quínitëré' xanë' lë'.

48 Channö cabí nözinë' tu bönni' huen dxin le rë'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni láchxë'ë lë' le zxön, le zxöntëro ca' unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplö bönachi
(Mt. 10:34-36)

49 Gunnë' ca' Jesús:

—Bida' neda' dujéna' ga tsegui guí' yödzölió ni, en caba láchxa'a chinaguéla' guí' na'.

50 Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'.

51 ¿Naru' réquili' bida' dulequi dxía' le raca yödzölió ni? Rea' libí'ili: ¡Calëga! Bida' duléquia' le gun ga ila'rúaj choplö bönachi.

52 Na'a isí lo ulu'lá'alén luzë'eguequi gayu' bönachi nacuá' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'.

53 Nu bönni' zóabi' bi'i bönni' queë' tá'baguë'ë zxí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu zxí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' zxí'ininu.

*Le nácagaca bë' le taca na'a dza**(Mt. 16:1-4; Mr. 8:11-13)*

⁵⁴ Jesús gudxë' ca' bönachi zián nacuá' ni', rnnë':
 —Cate' rilé'eli' za' böaj saca' ga ribía gubidza, la'
 rnnátëli': “Hualaj guiöj”, ate' caní raca.

⁵⁵ Cate' recja bö' za' saca' ga ridödi gubidza beo'
 ziaga, rnnali': “Udzá'a na'a”, ate' caní raca.

⁵⁶ Libí'ili', bönni' rulu'isö tsahui' cuinli'. Nözili'
 le rulu'í le raca lúzxiba, en le raca luyú ni, pero
 biti' réquibe'eli' le rulu'í le nácagaca bë' taca dza ni
 zóaru' na'a.

*Ral-la' ugá' analenru' tsahui' nu rilé rë'u**(Mt. 5:25-26)*

⁵⁷ Gunnë' ca' Jesús:

—¿Bizx que biti' ruchi'a rusöröli' la' libí'sili' ca
 naca le naca tsahui'?

⁵⁸ Channö zoa nu bi unabi yudxi li', ate' zéajli'
 idxinli' yúlahui', bë' ladxi' ugá' analenu' tsahui'
 nu na' tsanni ni' yú'uli' nöza, para cabí uzegui
 li' lahuë' bönni' uchi'a usöröë' libí'ili', ate' bönni'
 uchi'a usöröë' na' udödë' li' lu në'ë bönni' rusayjë'
 lidxi guié, ate' bönni' na' rusayjë' lidxi guié cu'ë li'
 lidxi guié na'.

⁵⁹ Rea' li', biti' uruju' ni' cate' údxirö quizxju'
 yúgu'të dumí lásido' ral-lu'u que nu na'.

13*Run bayudxi ubí'i ládxi'ru'*

¹ La' dza ní'isö bila'dxinë' bönni' ta'guíxjöi'inë'
 Jesús ca benë' Pilato, bëtië' bal-lë' bönni'
 Galilea, en guzxi'ë rön quégaquië', le bugútsi'në'
 xichöngacaba' böa' bëdxi chigulútië' légacaba' para
 ila'gu'ë xichöngacaba' na' lahuë' Dios.

2 Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zíca'rë' bönni' Galilea, tu' gula'gu'í gula'zaquië' caní?

3 Rea' libí'ili': ¡Calëga! Channö cabí ubí'i ládxi'li, nítili' ca' yúgu'tëli'.

4 Lëasca' caní guca quëgaquië' chizxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zíca'rö bönachi nacuá' Jerusalén?

5 Rea' libí'ili': ¡Calëga! Channö cabí ubí'i ládxi'li, nítili' ca' yúgu'tëli'.

Rucúdzu'ë didza' Jesús que yaga higo biti' bi ribía

6 Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Röjtijë' le ribía yaga na', pero biti' bi ridzölinë'.

7 Ní'irö gudxë' bönni' runë' dxin lu xiyúë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzövida'. Guchugu le. ¿Bizx que run nigui luyú ni?”

8 Ní'irö bubí'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani.

9 Channö cuía yaga ni, gaca dxi'a, pero channö cabí bi cuía, ní'irö ichugu' le.”

Ruúnë' Jesús tu nigula ré'enu cate' naca dza lá'ayi

10 Tu dza rusédinë' Jesús bönachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quëgaquië'.

11 Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en biti' ca' raca ulí cuinnu.

12 Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhué' quiu'.

13 Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba.

14 Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

15 Ní'irö bubi'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa?

16 Nácanu nigula ni xzí'ini xi'sóë' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

17 Cate' bë'ë didza' ni Jesús, bulu'tuí'inë' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönachi, yúgu'të nupa nacua' ni', tu' ta'lé'enë' yugu' le zxön runë' Jesús.

*Rucúdzü'ë didza' Jesús que xisedo' mostaza
(Mt. 13:31-32; Mr. 4:30-32)*

18 Ní'irö rnnë' Jesús:

—¿Nacxi caz raca rizzön le rinná bë'ë Dios, o bizxi uséqui'tseru' le?

19 Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxön, ate' bila'dxinba' biguinnido', gulunba' xcá'agacaba' lu ni'a në'e yaga mostaza na'.

*Rucúdzu'ë didza' Jesús que cúa zi que yöta xtila
(Mt. 13:33)*

20 Lësca' caní rnnë' Jesús:

—¿Bizxi caz uséqui'tseda' le rinná bë'ë Dios?

21 Naca ca cúa zi que yöta xtila, le guzxí'ínu tu nigula, en bugútsi'nu tsonna cö' cúa yöta xtila, ate' guyaxzaj idütë cúa na'.

*Tu ga tödiru' le naca guído'
(Mt. 7:13-14, 21-23)*

22 Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yödzödo', ate' rusédinë' bönachi nacuá' gapa na'.

23 Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacuá' ni', rnnë':

24 —Guli'güí'i ládxi'li' tsú'uli' saca' ga nu ridödi le naca guído', tu' rea' libí'ili': Zián nupa ilë'ëni ila'yaza ni', pero biti' ila'zéqui'në'.

25 Tödi chasë' Xan yu'u, en usayjë' yu'u, isí loli' libí'ili' na' zóali' ní'ilö ulídzali'-në' ra' yu'u na', ate' guiëli'-në': “Xan, Xan, gusalaj queëtu'.” Ní'irö ubi'ë didza' Lë', en guié' libí'ili': “Biti' nözda' nuzxi libí'ili'.”

26 Ní'irö isí loli' innali': “Güí'i gudágulentu' Li', ate' busédinu' gapa naca lu yë'ëyi queëtu'.”

27 Ní'irö guié' libí'ili': "Rea' libí'ili', biti' nözda' gazxi bönachi libí'ili'. Guli'cuíta ga zoa', yúgu'téli' ruá'ali' dö'."

28 Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacué' ga ni' rinná bë'ë Dios, pero libí'ili' sóali' ní'ilö.

29 Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios.

30 Ní'irö ilaca lo bal-la bönachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

Ribödxí yechë'ë Jesús ni'a quégaca bönachi Jerusalén

(Mt. 23:37-39)

31 La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—¡Burúaj! ¡Buzxunnaj ni! ¡Ré'ënë' Herodes gútië' Li'!

32 Jesús rë' légaquië':

—Guli'tséaj, guli'tsöjödxë' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxö, en cate' gaca lidzaj, údxí guna' dxin quia'."

33 Run bayudxi tséajlensa' ca' nöza na'a, en cuxö, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

34 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxí'gacali'-në' guiöj bönni' gubáz risöl-lë'ë Dios ga zóali'. Cate' xö zían luzuí gú'unida' utuba' libí'ili' quia' ca runba'

yöjede, rutúbiba' börado' queëba' zzan xíliba', pero bití' gú'unili'.

³⁵ Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná' bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'.

² Zoë' ca' tu bönni' ré'enë' huë' gui ga na' zoë' Jesús.

³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélé'ë bönni' huë' na', en bunë' lë', ate' la' busól-la'të' lë'.

⁵ Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

8 —Cate' nu bönni' ulidzë' li' guídu' ga raca laní que yöl-la' rutsaga na', bití' cö'u lataj lo. Nadxi ca' nulidzë' ca' tu bönni' nácatërë' lo ca li'.

9 Ní'irö bönni' na' bulidzë' li' huidë' ga zu', en guié' li': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö.

10 Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön.

11 Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

12 Jesús rë' ca' bönni' na' bulidzë' Lë', rnnë':

—Cati' gunu' tu gü'i huagu o tu lanído', bití' ulídzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégaquië', tu ulu'lidzë' ca' li', ate' caní gaca, ubí' quiu'.

13 Cate' gunu' tu gü'i huagu, bulidza yugu' bönachi yechi', en nupa nabixi ni'a ná'agaca, en nupa bití' raca sá'gaca, en yugu' bönni' lo chul-la.

14 Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí' quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

15 Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

16 Jesús rë' lë':

—Zoë' tu bönni' benë' laní zxön, ate' zían nupa bulidzë'.

17 Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dá! ¡Yúgu'të chinabá'a!"

18 Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj."

19 Ia'túë' rnnë': "Si' guzxi'a gayu' nózaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj."

20 Ia'túë' rnnë': "Si' butsaga na'a, en que lë ni na' bití' gaca guída'."

21 Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulënë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yë'ëyi, en gapa naca la' nöza que yödzo ni, ate' ichë'u yugu' bönachi yechi' ni, en nupa nabixi ni'a ná'agaca, en nupa bití' raca sá'gaca, en yugu' bönni' lo chul-la."

22 Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj."

23 Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ílí lidxa',

24 tu' rea' libí'ili': Bití' gahuë' que laní'quia' nitúë' bönni' ni' bulidza' zí'alö."

Le sáca'ru' cate' zéajlenru'-në' Cristo

25 Yugu' dza ni' röjácalen Jesús bönachi zián, ate' buécjë' Jesús, en rë' légaquië':

26 —Channö guí dalenë' neda' tu bönni', en biti' idxí'irönë' neda' ca nadxí'inë' xuz xinë'ë, en nigula queë', en yugu' zxi'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'.

27 Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' tē'ë neda', biti' gaca gáquië' bönni' usëda quia'.

28 Channö zoë' nu bönni' ladaj libí'ili' guë'ënnë' gunë' tu yu'u zían cuía, ¿naru' cabí cō'ë zí'alö ulabë' gáca'xi dumí ral-la' utöë' para inözinë' channö dë queë' tsca le riquinnë' para údxi gunë' yu'u na'?

29 Channö cabí gunë' caní, en isí lahuë' cuéquië' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë',

30 ila'nná: “Bönni' ni gusí lahuë' runë' yu'u, pero biti' guca údxi gunë' le.”

31 Lësca' caní, channö zoë' nu bönni' rinná bē'ë, en ral-la' tsejë' gudil-la tsöjtíl-lalenë' ia'túë' bönni' rinná bē'ë, ¿naru' cabí cō'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë?

32 Channö cabí séqui'në', cate' ni' zoë' zítu' ia'túë' bönni' na' rinná bē'ë, isól-lë'ë bönni' gubáz queë', ate' inábinë' lë' nacxi ral-la' gunë' para ulu'dzágüië' dxi'a.

33 Caní naca, channö zoë' nu bönni' ladaj libí'ili' biti' ucá'anë' yúgu'të le dë queë', biti' gaca gáquië' bönni' usëda quia'.

*Zödi' le naniti yöl-la' siná'a que
(Mt. 5:13; Mr. 9:50)*

34 Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a?

35 Bítirö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzë nagui nu na'.

15

Rucúdzu'ë didza' Jesús ca naca queëba' bö'cu' zxila' gunítiba'

(Mt. 18:10-14)

1 Bulu'dubë' yúgu'të bönni' tu'quízxjë' lázagaca bönachi, en yugu' bönni' cá'asö ga zoë' Jesús para ulu'zë náguië' Lë'.

2 Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

3 Ní'irö bucúdzu'ë didza' Jesús, rë' légaquië':

4—Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí uca'anë' ia'zíca'röba' tápalalaj yu' chënnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzölinë'-ba'?

5 Cate' udzölinë'-ba', lu yöl-la' rudzeja queë' ixóë'-ba' ya' zxicjë',

6 en cate' udxinë' lidxë' utubë' yugu' böchi' luzë'ë, en yugu' dzaga yu'u queë', ate' guié' légaquië': “Buli'dzéjalen neda', tu' chibudzövida'-ba' bö'cu' zxila' quia' gunítiba'.”

⁷ Rea' libí'ili': Lësca' caní gácatërö yöl-la' rudzeja yehua' yubá ni'a queë' tuë' bönni' dul-la' ubí'í ládxe'ë ca gaca quégaquië' tápalalaj yu' chënnë' bönni' tsahui', bönni' téquinë' biti' naquíniguequinë' ulu'bí'í ládxi'gaquië'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquéla'nu guí', ate' ulúanu yu'u, uguilaj yúdxinu le cate' udzölirönu le?

⁹ Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: “Buli'dzėjalen neda', tu' chibudzölıda' dumí plata na' guniti.”

¹⁰ Rea' libí'ili': Lësca' caní, ulu'dzėjade'erönë' gubáz lá'ayi queë' Dios ni'a queë' tuë' bönni' dul-la' ubí'í ládxe'ë.

Rucúdzu'ë didza' Jesús queëbi' tu bi'í gunitibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'í bönni' queë'.

¹² Bi'í cuidi' na' rëbi'-në' xúzibi': “Dad, benna quia' le dë quiu' le ral-la' guequi quia'.” Ní'irö xúzibi' na' gudísië' quégacabi' le dë queë'.

¹³ Nabábasö dza gudzé, bi'í cuidi' na' butúbibi' yúgu'të, ate' guyéajbi' tu yödzö zı'tu', ate' ni' butöbi' dërö le dë queëbi'. Le ruá' dö' benbi'.

¹⁴ Cate' chibutöbi' dërö le dë queëbi', guca gubín lu yödzö ga na' zóabi', ate' biyadzaj queëbi'.

15 Ní'irö guyéajbi' yöjsóabi' huen dxin quee' tu bönni' lu yödzö ni', ate' bönni' na' gusöl-lë'ë-bi' ga dë xiyüé' tsöjgágubi'-ba' yugu' cuchí quee'.

16 Guca ládxi'bi' gágubi' guixi' cá'asö na' táguba' cuchí, pero cuntú nu bi bē' le gágubi'.

17 Ní'irö bubí'i ládxi'bi', rnnabi': "Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún.

18 Uzá'a ni, huöja' ga zoë' xuzá', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' lí'.

19 Bítirö naca' neda' lesaca' gaca' xzí'inu'. Ben neda' ca bönni' huen dxin quiu'."

20 Ní'irö guyú'ubi' nöza, söhuöajbi' ga zoë' xúzibi'. 'Cate' ni' zóabi' zítu' suzá'abi', bilé'enë'-bi' xúzibi', en buéchi' ládxe'ë-bi'. Carelö yöjzxi'galë'-bi' xúzibi', en yöjnidë' yenbi', gudahuë'-bi' zxixi'.

21 Ní'irö xzí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' lí'. Bítirö naca' neda' lesaca' gaca' xzí'inu'."

22 Ní'irö xúzibi' rë' yugu' bönni' huen dxin quee', rnnë': "Guli'tsöjléajtë lari' nazáca'tërö, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'.

23 Guli'tsöjzxi'-ba' bëdxi renni', ate' guli'guti-ba'. Gáguru'-ba', en gunru' laní,

24 tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

25 'Tsanni ni' raca lë ni, zóabi' bi'i bönni' zí'alö quee' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'.

26 Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca.

27 Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'."

28 Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobi' tsú'ubi'.

29 Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ilena' xibé yugu' luzá'a.

30 Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'."

31 Ní'irö xúzibi' rë'ë-bi', rnnë': "Zxí'ina', li' zóalen cazu' neda' ate' yúgu'të le dë quia', quiu' nequi.

32 Ben bayudxi gunru' laní, en udzéjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdzu'ë didza' Jesús queë' bönni' huen dxin biti' náquië' tsahui'

1 Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nnë' queë' rutösë' le dë queë' xanë' na'.

2 Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu'?"

Bulu'í neda' le naca bë' dxin nunu', tu' cabirö gata' lu no'o uláz quia'."

³ Ní'irö guzá' l ádxë'ë bönni' huen dxin na', rnnë': ¿Nacxi guntsa? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnнасö quia'.

⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi.

⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?"

⁶ Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rö'ö chugu ral-lu'u."

⁷ Gudödi ni' gunábinë' ia'túë', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoaxtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u."

⁸ Réquibe'enë' xanë' na' sína'të benë' bönni' huen dxin bití' náquië' tsahui' na'. Caní naca, nácagacarë' sina' bönni' yödzölió ni lu le tunë' la' légacasë', ca nácagaca bönachi ta'dalen Dios lu bení' queë'.

⁹ 'Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dë queéli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ 'Nu rugún dxi'a dxin tu le cuídi'sö dë lu në'e, lësca' ugún dxi'a dxin tu le zxön gata' lu në'e. Nu bití' rugún dxi'a dxin tu le cuídi'sö dë lu në'e, bití' ugún dxi'a dxin tu le zxön gata' lu në'e.

11 Que lë ni na', channö cabí rugunli' dxi'a dxin yöl-la' tsahui' dë queëli' yödzöliö ni, ¿nuzxi caz udödi lu ná'ali' yöl-la' tsahui' le naca idú?

12 Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

13 'Biti' gaca nitúë' bönni' huen dxin gunë' xi-chíngaca chopa xanë', tu' udí'inë' tuë', en idxí'inë' ia'tué', o gunë' bal tuë', en uzóë' tsölá'alö ia'tué' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzöliö.

14 Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que lë ni na' bulu'titjë' Jesús.

15 Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nözinë' Dios le yu'u icja ládxi'do'oli', tu' naca lë na' tun zxön bönachi tu le ruzóë' Dios tsölá'alö.

Xibá queë' Moisés, en le rinná bë'ë Dios

16 Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

17 'Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

18 Gunnë' ca' Jesús:

—Channö tu bönni' ulá'alené' nigula queë', ate' utsaga ná'alené'-nu nigula yúbölö, guné' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusané'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdu'ë didza' Jesús, rnnë':

—Zoë' tu bönni' rilé'ené' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'sé' laní, ate' tē'aj tahuë' le banéquini.

²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' hué'tëzë' rō'ë ra' yu'u queë' bönni' na' rilé'ené' yöl-la' tsahui'.

²¹ Raca láchë'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'ené' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'.

²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalené' Abraham ga naca lataj lachi queë' Dios. Gútië' ca' bönni' na' bilé'ené' yöl-la' tsahui', ate' bulu'cáché'ë lë' yeru ba.

²³ Cate' ni' riguí'i rizáquë'ë bönni' na' bilé'ené' yöl-la' tsahui', zoë' lataj quégaca nupa nátigaca, guchisa lahuë', en bilé'ené' Abraham zoë' zi'tu', en dzáguië' Lázaro na' lë'.

²⁴ Ní'irö bē'ë zidzaj didza', rnnë': “Xuza', Abraham, buéchi' ladxi' neda'. Gusól-la' Lázaro quia' para usubisë' xibön nē'ë, en udusuhuöálë' lúdx'a'a, tu' riguí'i rizáca'a lu guí' ni.”

²⁵ Abraham rē' lë', rnnë': “Zxí'ina', busá' ládxu'u ca guca quiu', buzi'u xibé yöl-la' tsahui' tsanni

ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' riguí'i rizácu'u.

26 Ia'stú, tu ra' guí'a sibi rö', le zoa gatsaj láhui'lö ga ni' zóali' libí'ili', en ga ni zóatu' netu'. Que læ ni na' nupa nacué' ni, en ilë'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacué' ni'."

27 Ní'irö bönni' na' bilé'enë' yöl-la' tsahui' rë' læ', rnnë': "Xuza' Abraham, ráta'yua' lo' isöl-lu'u-në' Lázaro tsejë' lidxë' xuza',

28 tu' nacué'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí guídigaquië' ca' lataj ga ni riguí'i rizáca'a."

29 Ní'irö Abraham rë' læ', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zë' náguië'."

30 Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacué'ë, ulu'bí'i ládxi'gaquië'."

31 Abraham rë' læ', rnnë': "Channö cabí tu'zë' náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

17

*Run bönadxi queëru' gunru' ga nu gun dul-la'
(Mt. 18:6-7, 21-22; Mr. 9:42)*

1 Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'.

² Dxi'arö gaca queë' bönni' na' runë' caní, nu ugal-la' tu guiöj riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bi'i néquibi' quia'.

³ Guli'gún chi'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxe'ë, buniti lo lë'.

⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' li': "Rubí'i ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' tē' Lë', ta'nnë':

—Ben ga tséajlë'ërötu'-në' Dios.

⁶ Xanru' rë' légaquië', rnnë':

—La'tu' naca cuídí'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o ru-lapë', cate' údxi gunë' xichinë' xanë', çnaru' huëtsë' xanë' lë', innë': "Gudá, guró'ö gagu'?"

⁸ ¡Calëga! Caní guié' lë': "Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'."

9 ¿Naru' huëtsë' bönni' nadó'o queë' na': "Xclenu", tu' benë' ca gunná bé'enë' lë'? Runi neda', biti' gunë' caní.

10 Lësca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

Chië' bönni' té'enë' huë' nudzu' ruzödi

11 Tsanni ni' yu'ë Jesús nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea.

12 Cate' guyázië' tu yödzödo', bila'ruájë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zí'tu'sö,

13 en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

14 Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' söjáquië', bulu'huöáquië' dxi'a.

15 Ní'irö tuë' bönni' nútsë'ë ladjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ruí'tica'së' zidzaj didza', rigu'ë Dios yöl-la' ba.

16 Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria.

17 Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacuá'tsë' ia'zíca'rë' bönni' na'?

18 ¿Naru' cabí zoa nu huöda cu'u Dios yöl-la' ba, pero tuzë' bönni' zí'tu' ni?

19 Ní'irö Jesús gudxë' bönni' na', rnnë':

—¡Guyasa, en böaj lidxu! ¡Chiböácu' dxi'a tu réajlë'u neda'!

Ca idxín le rinná bë'ë Dios
(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë Jesús bátaxi ral-la' idxín le rinná bë'ë Dios, Lë' bubi'ë didza', rë' légaquië':

—Ca idxín le rinná bë'ë Dios, biti' naca le ilé'eli'.

²¹ Cuntu nu gaca inná: “¡Ni bidxín!”, o inná: “¡Ni bidxín!” ¡Bulí'yútsöca'! ¡Rinná bë'ë Dios lu icja ládxi'do'gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero biti' ilé'eli' le.

²³ Ila'cuá' nupa ilë libí'ili': “¡Ni zoë'!” , o ilá'nná: “¡Ni' zoë'!” Biti' tséajli' ni', en biti' tséajlenli' légaquië'.

²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi.

²⁵ Zí'alö ca gaca lë ni, run bayudxi quí'i sáca'da', ate' bönachi dza ni zóaru' na'a ulu'cá'ana neda' cá'asö.

²⁶ Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi.

²⁷ Dza ni'te na' gulë'aj gulahuë'. Bulu'tsaga ná'agaquië', en bulu'dödë' xzí'inigaquië' lu yöl-la' rutsaga na' ga bidxintë dza guyázië' Noé lë'e barco zxön na' nazí'i le arca, ate' bidxintë nisa guió'j usuniti yödzólió le busuniti yúgu'të'.

²⁸ Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'.

29 Cate' bidxín dza na' burúajë' Lot lu yödzo Sodoma, böxaj gui' ca tu nisa guiöj, enca' le ruzéguida' nazí'i le azufre, ate' bulu'suniti yúgu'të'.

30 Lësca' caní gaca cate' idxín dza uluí'i lahua' neda', Bönni' Guljë' Bönachi.

31 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ralla' huötjë' tsöjzxi'ë le dë queë', ate' nu zoa la' guixi', lësca' caní, biti' ral-la' huöjë' lidxë'.

32 Guli'sá' ladxí'li' ca guca queënu nigula queë' Lot.

33 Nu bönni' rë'ënë' gun chi'ë yöl-la' na'bán queë', unítie' le, pero bönni' udödë' yöl-la' na'bán queë' ni'a quia', udélé'ë le.

34 'Rea' libí'ili': Cate' idxín rëla na', ila'cu'ë chopë bönni' tsözxön ga tasië', ate' tuë' uduzxi'a-në', en ia'túë' ucá'ana' lë'.

35 Ila'cuá'anu huëtu tsözxön chópanu nigula, ate' tunu uduzxi'a-nu, en ia'tunu ucá'ana'-nu.

36 Ila'cu'ë chopë' bönni' la' guixi', ate' tuë' uduzxi'a-në', en ia'túë' ucá'ana' lë'.

37 Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusö'öë'

1 Ní'irö bucúdzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopa ladxí'ru'.

2 Rnnë':

—Zoë' tu bönni' ruchi'a rusöröë' tu yödzö, bönni' biti' rádxiñë' Dios, en biti' runë' nu bönni' bal.

³ La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnnanu: “Buchi'a busörö le run quia' nu ruá' dö' quia'.”

⁴ Xidzé biti' gú'unnë' bi gunë' queënu, pero gudödi ni' guzá' ladxë'ë, rnnë': “Biti' rádxiñë'-në' Dios, en biti' runa' nu bönni' bal,

⁵ pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guídatíca'sinu ni, en para cabí tödi bë' upízxjanu neda'.”

⁶ Ní'irö Xanru' rë' légaquië', rnnë':

—Guli'zé nágalí' ca na' gunné' bönni' ruchi'a rusöröë' na', bönni' biti' náquië' tsahui'.

⁷ ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'?

⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzö'lida' nupa ta'yéajlë' neda' luyú ni?

Tu bönni' yudo' fariseo, en tu bönni' uquíxaj

⁹ Bucúdzü'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zíca'rö bönachi.

¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië' bönni' ruquíxjë' lázagaca bönachi.

¹¹ Guzuínë' bönni' yudo' fariseo na', en caní bu-lidzë' Dios, rnnë': “Dios, rea' Li': Xclenu', tu' cabí naca' ca nácagaquië' ia'zíca'rë' bönni', nácagaquië'

gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquízxaj ni.

¹² Neda' runa' gubasa chopa luzuí tu' xunu' dza huéaj, en runödza' que yudo' tu cö' huéaj tu' chi cö' que yúgu'të le rata' quia'."

¹³ Guzóazë' zi'tu' bönni' uquízxaj na', en biti' böázxjanë' ichisa lahuë' uyúë' lúzxiba, pero gudapë' luchu'ë, rnnë': "Dios, buéchi' ladxi' neda', bönni' dul-la'."

¹⁴ Neda' rea' libí'ili': Böajë' lidxë' bönni' uquízxaj na', nuhuöáquië' tsahui' lahuë' Dios, calëga ia'tué' bönni' ni'. Núti'tës bönni' run ba zxön cuinë', gunë' Dios ga huöta' igulë', pero nu bönni' rizóë' nöxaj ladxi', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'
(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quëgaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'.

¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Guli'gü'i-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa nácagaca ca bi'i caní lataj ga rinná bë'ë Dios.

¹⁷ Le nácaté rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', biti' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'
(Mt. 19:16-30; Mr. 10:17-31)

18 Tu bönni' unná bē' gunábinē' Jesús, rnnē':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

19 Jesús rē' lē':

—¿Bizx que rē'u neda': "Idú dxi'a"? Cuntu nu bönni' náquiē' idú dxi'a. Tuzē' Dios náquiē' idú dxi'a.

20 Nöz quézinu' yugu' le gunná bē'ē Dios:
Biti' gunu' dul-la' le riguitsaj xibá que yöl-la' nut-saga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatē.

Ben bal xuz xinó'o.

21 Bönni' na' rē' Jesús, rnnē':

—Yúgu'tē lē ni runa' ga gudela' naca' bí'ido'.

22 Cate' biyönnē' Jesús didza' ni, rē' lē':

—Ia'tú le riyadzaj quiu' gunu'. Bēti' yúgu'tē le dē quiu', ate' lē na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

23 Cate' bönni' na' biyönnē' didza' ni, ruhu'innē', tu' dēda' yöl-la' tsahui' queē'.

24 Cate' bilé'enē' Jesús ca na' ruhu'innē' bönni' na', rnnē':

—¿Bica' böniga gaca, ila'yaza nupa ta'lé'e yöl-la' tsahui' ga rinná bē'ē Dios!

25 Gácarö tódiba' böa' nagui yötsi', ca tsáziē' tu bönni' rilé'enē' yöl-la' tsahui' ga rinná bē'ē Dios.

26 Ní'irö nupa bila'yöni didza' ni gula'nná:

—¿Nuzxi caz gaca ulá, channö?

27 Jesús gudxē' légaquiē':

—Le bití' gaca ilunē' bönni', huáca gunē' Dios.

28 Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

29 Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' xzi'inë', tu' ruí'i lãdxë'ë inná bë'ë Dios,

30 bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigu'xjö'ë leyúbölö ca si' ilútië' Lë'

(Mt. 20:17-19; Mr. 10:32-34)

31 Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi.

32 Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titjë' neda', en ulu'lidza zi'ë neda', en ulu'chejë' neda' zxöna'.

33 Ila'guinë' neda', ate' tödirö ni' ilútië' neda', pero cate' gaca tsonna dza ubana'.

34 Biti' gula'yéajni'inë' bönni' usëda queë' didza' ni, en bití' guléquibe'enë' ca sa'yéaj le ruí'ilenë' légaquië' didza' que, tu' naca le cabí sequí' ila'yéajni'inë'.

Jesús ruúnë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

35 Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nōza rinabë' nu bi gúnna'sö queë'.

36 Bönni' ni' biyönnë' ta'dödi bönachi zián ni', ate' gunabë' bizxi na' raca.

37 Bönachi ni' të lë':

—Jesús, bönni' Nazaret, ridödë' ni.

38 Ní'irö bönni' na' nachul-la lahuë' bë'ë zidzaj didza', rnnë':

—¡Jesús, xzí'ini xi'sóë' David, buéchi' ladxi' neda'!

39 Yugu' bönni' nanörugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bë'ë didza', rnnë':

—¡Xzí'ini xi'sóë' David, buéchi' ladxi' neda'!

40 Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

41 —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënida' huöálaj guiöj lahua'.

42 Jesús rë' lë':

—Chiböálaj guiöj lo'. Chiböácu' tu' réajlë'u neda'.

43 La' ní'sö bulé'etenë', ate' sa'yéajlenë' Jesús, rigü'ë Dios yöl-la' ba. Lësca' yúgu'të bönachi nacué' ni', en bila'lé'e lë' na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázië' Jesús yödzö Jericó, en ridödë' lu yödzö na'.

² Zoë' tu bönni' lë' Zaqueo ni', bönni' lo ládjagaquië' bönni' uquízxaj, ate' dë yöl-la' tsahui' queë'.

³ Ru'i ladxë'ë bönni' ni ilé'enë' Jesús, pero biti' guca queë' tu' nacua' bönachi zián ni', en náquië' bönni' ga ré'ëdo'.

⁴ Ní'irö carelö yöjnöruë' lógaca bönachi zián na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'.

⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en ré' lë':

—Zaqueo, bötjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'.

⁷ Cate' bila'lé'e bönachi nacua' ni' lë ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá'analenë' bönni' dul-la'.

⁸ Ní'irö guzuínë' Zaqueo, en ré' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizxja' bönachi, ubi'a quégaca bönachi na' tapa cö'tëlö ca'.

⁹ Jesús ré' lë':

—Na'a dza ni bidxín yöl-la' rusölá quégaca nupa nacua' yu'u ni, tu' nababë' bönni' ni dï'a dza queë' Abraham.

¹⁰ Bida' neda', Bönni' Guljë' Bönachi, ududilja', en udusölá' nupa nanítigaca.

Rucúdzu'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, ré' légaquië' le rucúdzu'ë didza', tu' chizóa ila'dxinë' yödzo Jerusalén, ate' téquinë' chizóatë ilá' lahui le rinná bë'ë Dios.

¹² Caní rnnë' Jesús:

—Zoë' tu bönni' lo, sa'yéajë' tu yödzo zi'tu' para si' lu në'ë yöl-la' unná bë', ate' ní'irö huödë'.

13 Cate' chizóa tsejē' ni' bulidzē' chiē' bönni' huen dxin queē', en bē'ē que queēgaquiē' tu cō' huéaj dumí, ate' rē' légaquiē': "Guli'guílajlen dumí ni tsanni huöda'."

14 Yugu' bönni' uládz queē' biti' ta'lé'enē' lē' dxi'a, ate' gula'söl-lē'ē yugu' gubáz quēgaquiē' ga ni' tsejē', ila'nnē': "Biti' rē'ēnitu' inná bé'enē' bönni' ni netu'."

15 Ní'irō guzxí' lu nē'ē yöl-la' unná bē', ate' budxinē' ladzē'. Cate' bidxinē' ni' gunná bé'enē' nu tsöjlidza yugu' bönni' huen dxin na' budödē' lu ná'agaquiē' dumí na', para inözinē' gáca'xi bulu'guílajlenē' le tu tuē'.

16 Cate' bönni' zí'alö na' bidxinē' lahuē', rnnē': "Xan, tu cō' dumí quiu' na' chibén icja ia'chí cō' ca'."

17 Xanē' na' rē' lē': "Tsahui' benu'. Nacu' huen dxin tsahui'. Tu' dxi'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö."

18 Ní'irō bidxinē' ia'tué' bönni' huen dxin na' lahuē' lē', rnnē': "Xan, tu cō' dumí quiu' na' chibén icja ia'gayu' cō' ca'."

19 Xanē' na' rē' ca' lē': "Inná bé'enu' gayu' yödzö."

20 Ní'irō bidxinē' ia'tué' lahuē' lē', rnnē': "Xan, ni dē tu cō' dumí quiu' na'. Ben chí'a le, butúlida' le lari'."

21 Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'."

22 Ní'irō xanē' na' rē' lē': "Nacu' huen dxin biti' naca tsahui'. Ni'a que didza' bē'u uchi'a usöróa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?"

²³ Na'a, ¿bizx que biti' yöjlú'u dumí quia' na' ga gun icja, para cate' huöda', uzi'a le idú len icja na'?"

²⁴ Ní'irö rē' nupa nacuá' ni': "Guli'cúa lu nē'ē dumí na', ate' guli'gü'i queē' bönni' na' dē queē' chi cō' dumí."

²⁵ Légaquiē' tē' lē': "Xan, chidē queē' chi cō' dumí."

²⁶ Ní'irö bubí'ē didza' xángaquiē', rnnē': "Rea' libí'ili': Nu rugún dxi'a dxin le do' dē lu nē'e, ulu'zxöni lādxi'gaca lē' ia'late', pero nu biti' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e."

²⁷ Ca naca quégaquiē' bönni' ni' biti' ta'lé'enē' neda' dxi'a, en biti' gulé'ennē' inná bé'eda' légaquiē', guli'tsöjzxi' légaquiē' para ídigaquiē' ni, ate' guli'guti légaquiē'."

*Len yöl-la' ba zxön raziē' Jesús yödzö Jerusalén
(Mt. 21:1-11; Mr. 11:1-11; Jn. 12:12-19)*

²⁸ Cate' budxi gunné' caní Jesús, bugué'lē'ē xinözē', sa'yéajē' zaca' yödzö Jerusalén.

²⁹ Cate' bila'dxinē' gala' ga nacuá' yödzö Betfagé, en yödzö Betania, ga naca ra' guí'ado' nazí'i le Guí'a Yaga Olivo, gusöl-lē'ē Jesús chopē' bönni' usēda queē',

³⁰ ate' rē' légaquiē':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntu nu ribíani lē'ba'. Guli'sedxi-ba', en guli'duchē'-ba' quia' ni.

³¹ Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnē'-ba'."

³² Söjáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'.

³³ Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'chë'ë-ba' ga na' zoë' Jesús. Cate' chigula'xóë' yugu' lari' tsölä'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'.

³⁶ Gapa ral-la' tödë' Jesús, gula'chiljë' lari' quégaquië' la' nöza.

³⁷ Cate' chibila'dxinë' gala' ga zoa lidinni que Guía Yaga Olivo, lu yöl-la' rudzeja quégaquië' gula'sílógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús.

³⁸ Ta'nnë':

—¿Yöl-la' ba bönni' unná bë' ni zë'ë uláz queë' Xanru' Dios! ¿Yehua' yubá za' le ribequi dxi ládi'ru'! ¿Yöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zián ni' të' Jesús, ta'nnë':

—¿Bönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rë' légaquië':

—Rea' libí'ili': Channö ila'cuá' dxíë' bönni' ni, yugu' guiöj hualuí'i caz zidzaj didza'.

⁴¹ Cate' bidxinë' Jesús gala' ra' yödzo na', en rilé'enë' le, ní'irö ribödxë' que,

⁴² rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a china-gachi' queéli', para cabí ilé'eli' le.

⁴³ Huala'dxín queéli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lë'alö, ate' yúgu'të lataj idú gásibi'ilö ilúnlenë' libí'ili' gudil-la.

⁴⁴ Ulu'quínajë' zö'ö run chi'i yödzö queéli', en ilútië' nupa nacué' lu yödzö ni. Biti' ugá'ana guiöj lahui luzé'e. Yúgu'të lë ni gaca queéli' tu' cabí gúquibe'eli' dza bidë' Dios buduyué' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irö guyázië' Jesús lö'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lö'a yudo'.

⁴⁶ Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'.

⁴⁸ Biti' bulu'dzölinë' nacxi ilútië' Lë', tu' idú ládxi'gaca tu'zé nágagaca yúgu'të bönachi xtídzë'ë.

20

Yöl-la' unná bë' dë lu në'ë Jesús

(Mt. 21:23-27; Mr. 11:27-33)

¹ Tu dza, cate' ni' rusédinë' Jesús bönachi ga naca chila yudo', en riguíxjö'ë didza' dxi'a, bila'dxinë'

yugu' bixúz unná bē', en bönni' yudo' tu' sédinē', len bönni' gula tu' zéajni' inē', ga na' zoē',

² ate' tē' Jesús:

—Gudixjōi' i netu'. ¿Bizxi yōl-la' unná bē' dē lu no'o runu' caní? ¿Nuzxi caz budōdi lu no'o yōl-la' unná bē' ni?

³ Bubi'ē didza' Jesús, rē' légaquiē':

—Inábida' ca' libí'ili' tu didza', ate' ubí'ili' innali'.

⁴ ¿Nuzxi gusól-la' Juan ruquilē' bōnachi nisa? ¿Naru' Dios, o bōnachi?

⁵ Gulún xtídza' gaquiē' la' légacasē' bönni' yudo' na', ta'nnē':

—Channō innaru': Gusól-lē'ē Dios lē', guíe' rē'u: “¿Bizx que bití' guyéajlē'ēli'-nē'?”

⁶ Channō guiēru'-nē': Gula'sól-lē'ē yugu' bönni' lē', bōnachi lu yōdzō ni ulu'laxi' rē'u guiōj, tu' nōziguequi bē'ē didza' Juan na' uláz queē' Dios.

⁷ Ní'irō bulu'bi'ē didza', ta'nnē':

—Bití' nōztu' nuzxi na' gusól-la' Juan.

⁸ Ní'irō Jesús rē' légaquiē':

—Neda' ca' bití' guía' libí'ili' bi yōl-la' unná bē' rúnida' caní.

Yugu' bönni' huen dxin bití' nácagaquiē' tsahui'

(Mt. 21:33-44; Mr. 12:1-11)

⁹ Ní'irō la' gusí lotē' Jesús ru'ilenē' bōnachi nacuá' ni' didza'. Rucúdzu'ē didza', rnnē':

—Zoē' tu bönni' budē'ē yugu' lubá uva lu xiyúē', ate' budōdē' luyú na' lu ná'agaquiē' bönni' huen dxin para ilún gatsjē' len lē' le ulu'zi'ē', ate' guyijē' zi'tu' ga ni' bugá'anē' xidzé.

¹⁰ Cate' bidxín dza ulu'chibē' uva luyú na', gusól-lē'ē tuē' bönni' gubáz queē' ga na' nacu'ē huen dxin

na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö.

¹¹ Leyúbölö gusöl-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'söl-lë'ë lë' cá'asö.

¹² Leyúbölö gusöl-lë'ë quégaquië' bönni' bunni gubáz queë', ate' bulu'dxië' ca' lë' huë', en bulu'béajë' lë' ní'ilo luyú na'.

¹³ 'Ní'irö guzá ládxië'ë xani luyú na', gunné': "¿Nacxi guntsa'? Isöl-la'a zxi'ini caza' nadxi'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal."

¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': "Bi'i ni guequi queëbi' luyú ni. Guli'dá, gútiru'-bi', para guequi queëru' le ral-la' guequi queëbi'."

¹⁵ Bulu'béajë'-bi' ní'ilo luyú na', en gulútië'-bi'.

'Na'a, ¿nacxi caz gunë' xani luyú na' quégaquië'?

¹⁶ Guídë', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacué' ni' bila'yöni lë' ni, gula'nnë':

— ¡Inná Dios bití' gaca caní!

¹⁷ Ní'irö buyúë' Jesús légaquië', rnnë':

— ¿Bizxi sa'yéaj lë' na' nazúaj lu guichi lá'ayi, rnna: Guiöj na' gula'rú'unë' bönni' huen zö'ö, guiöj ni chinaca guiöjlen squin zö'ö?

¹⁸ Núti'tës nu ibixi lahui guiöj ni, quítsaj nu na', ate' nu bönni' tsöjbága' guiöj ni lë', uzxuzxaj lë'.

*Ca naca dumí ta'guizxaj lázagaca bönachi
(Mt. 21:45-46; 22:15-22; Mr. 12:12-17)*

19 La' dza ní'sö, yugu' bixúz unná bē' len bönni' yudo' tu'sedinē' gula'zóa gula'bō'ē ila'zōnē' Jesús, tu' téquibe'enē' gunnē' quégaquiē' lē na' bucúdzu'ē didza', pero guládxinē' bi ilún bönachi zían nacuá' ni'.

20 Ní'irö bulu'yúyeniē' Jesús, en gula'söl-lē'ē yugu' bönni' para ulu'béajē' Lē' didza', bönni' ulu'lu'i cuíngaquiē' ca bönni' tsahui', para ilunē' ga bi innē' Jesús, para gaca ulu'dödē' Lē' lu nē'ē bönni' rinná bé'enē' uláz queē' César.

21 Para ilunē' caní, gula'nábinē' Jesús, ta'nnē':

—Bönni' Usedi, nöztu' rno' le nácatē, en rusédinu' le nácatē, en biti' ruchi'a rusöröu' ca naca le tu'lu'isö lahui bönachi, pero idütē li naca ca rusédinu' xibá queē' Dios.

22 Gudíxjöi'i netu'. ¿Naru' run bayudxi quixxaj laztu' queē' César, bönni' Roma rinná bē'ē, o cabí?

23 Réquibe'enē' Jesús le té'ennē' ilunē' queē', ate' rē' légaquiē':

—¿Bizx que rizí' bē'ēli' neda'?

24 Buli'lu'itsöqui' neda' tu dumí ridá. ¿Nuzxi lahui da' lē'e ni, en nuzxi le nazúaj ni?

Bulu'bi'ē didza', ta'nnē':

—Queē' César na'.

25 Ní'irö Jesús rē' légaquiē':

—Buli'nödzej queē' César le nequi queē' César, ate' queē' Dios le nequi queē' Dios.

26 Biti' guca ilunē' ga bi innē' Jesús para gaca ulu'zéguiē' Lē' didza' lógaca bönachi zían na', pero bulu'báninē' ca naca didza' bubí'ē, ate' bulu'sayaj ruá'agaquiē'.

*Ca gaca quégaca nupa ulu'bán lu yöl-la' guti
(Mt. 22:23-33; Mr. 12:18-27)*

27 Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

28 —Bönni' Usedi, Moisés buzúajë' queëru' lu guichi, le rnna: “Channö gátië' nu bönni', ate' ugá'ananu nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'.”

29 Gula'cuá'abi' gadxi bi'i bönni' nácagacabi' böchi'bi', ate' bi'i zí'alö na' butsaga ná'alenbi' bi'i nigula, en gútibi', biti' zóabi' bi'i queëbi'.

30 Ní'irö bi'i buropi na' butsaga ná'alenbi'-nu nigula na', ate' gútibi' ca' bi'i ni, biti' zóabi' bi'i queëbi'.

31 Butsaga ná'alenbi'-nu bi'i bunni na', ate' la' tuz ca gulunbi' igádxitëbi', ate' gulátibi', biti' zóabi' bi'i quégacabi'.

32 Ga búdxitë, gútinu ca' nigula na'.

33 Na'a, cate' ulu'bán nupa chinátigaca, çnúzxilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

34 Ní'irö bubí'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzejë'-bi' zxí'inigaquië' para ulu'tsaga ná'agacabi'.

35 Na'a, nupa nácagaca lesaca' ulu'bán lu yöl-la' guti, en tsöjcuá' yödzölió si' gata', biti' ilún yöl-la' rizóalen nigula, en biti' ulu'tsaga ná'agaca.

³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxí'ini cazë' Dios.

³⁷ Ca na' ral-la' ulu'bán nupa chinátigaca, ru-luí'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob.

³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi zxí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' zxí'inë' David”?

⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu zxíbigaca lo' nupa ta'dá'baga' Li'.”

⁴⁴ David caz na' gunnë' queë' náquië' Xanë'.
¿Nacxi caz naca, rnnali' libí'ili' náquië' zxí'inë'?

Jesús ruzégui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönachi nacué' ni' tu'zë nágagaca Jesús, rë' yugu' bönni' usëda queë':

46 —Guli'gún chi'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dë' nácugaquië' lari' tunna, en té'ënnë' ulu'lidza bönachi légaquië' zxön gapa naca lu yé'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sedë' queë' Dios, en gapa ta'bö'ë tahuë'.

47 Ta'güë' lédxigacanu nigula uzëbido', ate' para ulu'lu'i tsahui' cuíngaquië', xidzé tu'lidzë' Dios. Yugu' bönni' ni, yënni'tërö gunë' Dios ga ila'gu'i ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu gu'ina que dumí gun que yudo'.

² Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os.

³ Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzëbido' ni ca ia'zica'rö bönachi na' ta'gu'ë dumí.

⁴ Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ralla' gáhuinu.

Rigúxjö'ë Jesús ca ulu'sunítië' yudo'

(Mt. 24:1-2; Mr. 13:1-2)

⁵ Nacuá' ni' nupa tu'i didza' ca naca que yudo' na', ca na' nazí'i biquitaj que, yugu' guiöj

nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶—Yúgu'të lë ni rilé'eli', huadxín dza cate' bíti'rö ugá'ana guiój lahui luzé'e ni, tu' ulu'suniti bönachi yudo' ni.

*Le ilaca bë' cate' si' idxín dza údxi
(Mt. 24:3-28; Mr. 13:2-23)*

⁷Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'zí'i lágaquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'.

⁹Cate' yónili' raca gudil-la, en ta'dá'baga' bönachi yúlahui', bití' gadxi idzöbili', tu' run bayudxi ilaca le caní, pero bití' zuítëni dza údxi.

¹⁰Ní'irö rë' ca' légaquië':

—Til-la tu yödzo len ia'tú yödzo, ate' bönachi tu ga nu rinná bë' ila'díl-lalen bönachi ia'tú ga nu rinná bë'.

¹¹Tödigaca budó' zxu', ate' zían lataj gaca gubín, en ilatsaj yödzo'hué' zxon. Ila'lá' lahui lúzxiba le ilún gadxi bönachi, en le ilaca bë'.

¹²'Zí'atëlö cate' si' ilaca lë ni, ila'zön bönachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi guíë. Ila'ché'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'.

13 Gaca caní queëli' para séqui'li' gunli' ba nali' quia' neda'.

14 Tsutsu guli'gún ládxi'li', para cabí cuéqui ícjali' zí'alö nacxi innali' uláz queëli',

15 tu' gunna' queëli' didza' ubí'ili', en yöl-la' réajni'i, para cabí gaca ulu'cul-lè' libí'ili', en para cabí gaca bi ila'nné' que xtídza'li' bönni' ni' biti' ila'lé'ené' libí'ili' dxi'a.

16 Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútié' bál-lali'.

17 Yúgu'të bönachi ulu'zóa libí'ili' tsölá'alö tu' dá'alí' neda',

18 pero biti' initi nitú guitsa' ícjali'.

19 Channö ugá'anali' tsutsu, idéli'li' yöl-la' na'bán idú.

20 'Cate' ilé'eli' bönni' rójáquië' gudil-la nagú'ugaquië' lë'a Jerusalén, inözili' chibidxín dza initi yödzö ni.

21 Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni.

22 Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'.

23 Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí'nu-bi' bí'ido', tu' ila'guí'i ila'záca'da' bönachi nacuá' ni', ate' Dios gúndë'ë bönachi ni' xíguia'.

24 Ilátië' zíanë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bë' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)

25 Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'.

26 Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzölió, en ila'zxizi le nalá'gaca lúzxiba.

27 Ní'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná'bë', ate' ilá' lahui yöl-la' zxön quia'.

28 Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huóá'ua' libí'ili'.

29 Jesús gudxë' ca' légaquië' tu le bucúdzu'ë didza', rnnë':

—Buli'yútsöca' ca raca que yaga higo, en que bíti'tës yaga yúbölö.

30 Cate' rilé'eli' ta'lén ni'a në'e huë'ënido', nöz quézili' chizá' gala' cusu ba.

31 Lësca' caní, cate' ilé'eli' chitaca yugu' lë ni, inözili' chizá' gala' dza idinná'bë'ë Dios luyú ni.

32 'Le nácatë rea' libí'ili', biti' ilátigaca bönachi ila'cuá' dza ni' cate' ilaca yúgu'të lë ni.

33 Ila'dödi que lúzxiba, en que luyú ni, pero xtídza'a, biti' tödi cá'asö, tu' idxín caz ca rnna.

34 'Guli'gún chi'i cuinli' para cabí gü'ili' lataj tsaza icja ládxi'do'oli' le gun ditaj lib'ili', lë na' naca yöl-la' rágul'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti ladxi',

35 en para cabí gaca queéli' ca tu le rizón bönachi, ca naca le gaca quegaca yúgu'të bönachi nacuá' idútë yödölió.

36 Que lë ni na', guli'sóa ban ladxi', en buli'lídzatica'sé' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljé' Bönachi.

37 Lahui' dza rizóë' Jesús chila yudo', rusédinë' bönachi, ate' chi'i dzó'ölö rirúajé' ni', en rejé' lu gu'ado' nazí'i le Guí'a Yaga Olivo.

38 Yugu' zila bila'dxín yúgu'të bönachi ga zoë' Jesús chila yudo' para ulu'zë náagagaca xtídzë'ë.

22

Tun xtídza'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-

53)

1 Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na',

2 bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéqui'në' tu' tádxinë' bi ilún bönachi.

3 Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasöl-lë'ë Cristo.

4 Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'.

⁵ Bulu'dzéjanë' bönni' yudo' na', en gula'zí' lu ná'agaquië' ulu'nödzejë' queë' dumí.

⁶ Raza ládxë'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua.

⁸ Jesús gusöl-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lë':

—¿Gazxi rë'ënu' tsöjpá'atu' queëru'?

¹⁰ Jesús rë' légaquië', rnnë':

—Buli'yútsöca', cate' tsú'uli' lu yödzo ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'.

¹¹ Guli'guíë' xan yu'u na': “Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?”

¹² Ní'irö uluí'inë' libí'ili' tu yu'u zxön xitsá' ga ní' chinabá'a. Buli'pá'a ní' le gáguru'.

¹³ Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ní' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön.

¹⁵ Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ní' zí'atëlö cate' sí' qui'i saca'a, en gátia'.

16 Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bē'ë Dios.

17 Gudélē'ë Jesús tu zxíga'do', en gudxē' Dios: "Xclenu'." Ní'irö rē' légaquiē':

—Guli'sí lë ni, en guli'gu'aj lati' huéaj,

18 tu' rea' libí'ili': Bítirö guí'ja' xisi uva cate' idxinrö le rinná bē'ë Dios.

19 Ní'irö gudélē'ë yöta xtila, en gudxē' Dios: "Xclenu'." Gudödi ni' buzzuxjē' le, en bē'ë que queégaquiē', rnnē':

—Lë ni naca idútē le naca' le rudöda' uláz queéli'. Guli'gún caní para usá' ládxi'li' neda'.

20 Cate' budxi gulahuē', lësca' caní bē'ë didza' que zxíga'do' na', rnnē':

—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queéli'.

21 'Na'a, bönni' na' udödē' neda' lu ná'agaca bönachi rō'ë rágulenē' neda' tsözxön.

22 Le nácatē huayija' ga ilútiē' neda', Bönni' Guljē' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödē' neda'.

23 Ní'irö gula'sí lógaquiē' ta'nábinē' Lē' tu tuē', ta'nnē':

—¿Núzxilötu' nu gun caní?

Tuí'ixtídzagaquiē' núzxilögaquiē' gáquiē' lo

24 Ní'irö gulu'ë didza' la' légacasē' núzxilögaquiē' idéli'nē' lataj lo.

25 Jesús gudxē' légaquiē':

—Yugu' bönni' unná bē' tu'gunē' dxin yöl-la' unná bē' queégaquiē', ta'nná bé'enē' bönachi, ate' nupa

ni dë lu ná'agaca yöl-la' unná bē', lëgaquië' bönni' tácalen.

²⁶ Libí'ili' biti' ral-la' gunli' caní, pero nu naca lo ladjali' ral-la' gaca ca nu naca cuídi'tërö, ate' nu rinná bē' ral-la' gaca ca nu run dxin quéguequi luzé'e.

²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' ni guzóalenli' neda' cate' ni' bi guca quia', yugu' le gula'zí' bē' neda'.

²⁹ Que lë ni na' udöda' lu ná'ali' tu ga inná bē'ëli', ca na' benë' Xuza', budödë' lu na'a ga inná bē'a neda'.

³⁰ Caní guna' para gaca cö'öli', en gu'aj gágulenli' neda' ga ni' inná bē'a, ate' cö'öli' xilataj cázali' ga uchi'a usöröli' idxinnu cö' zxí'ini xi'söë' Israel.

*Rnnë' Jesús innë' Pedro biti' núnbë'ë Lë'
(Mt. 26:31-35; Mr. 14:27-31; Jn. 13:36-38)*

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoá' xtila,

³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóacu' quia', butipa lädxi'gaquië' böchi' luzó'o.

³³ Pedro rë' Lë':

—Xan, chizóa' sá'lëna' Li', calëgasö tseja' lidxi guié, pero lësca' gátilena' Li'.

³⁴ Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa ilútië' Lë'

³⁵ Jesús gunábinë' légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopa cö xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guíë tuchi' ral-la' guti' lari' rixóa yeni, en si' tu guíë tuchi'.

³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnna: “Gulunë' queë' ca tunë' quégaca nupa tua' dö”, ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopa guíë tuchi'.

Lë' rë' légaquië':

—Chinaca.

Jesús rulidzë' Dios la' yëla Getsemani'

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' sōjácalenë' Lë'.

⁴⁰ Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

41 Ní'irö Jesús guzë'ë ga na' nacu'ë, en gudödë ia'lati' tsca ga ridxín tu guiöj rirú'uniru', ate' ni' buzóa zxibë', en rulidzë' Dios.

42 Rnnë':

—Xúz, channö rë'ënu', bucuása ga zoa' lë na' ralla' quí'i saca'a, pero calëga ca rë'ënda' neda', pero ca rë'ënu' Li' gunu'.

43 Ní'irö bulufí' lahuë' gubáz lá'ayi queë' Dios, zë'ë yehua' yubá, ate' butipë' lãdxë'ë Jesús.

44 Lu yöl-la' risëbi ladxi' queë', idú lãdxë'ë Jesús bulidzë' Dios, ate' nisa yösa queë' guca ca rön raba' luyú.

45 Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'.

46 Ní'irö Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

47 Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanöruë' lógaquië' bönni' zían na'. Gubígui'ë ga zoë' Jesús para utsaga lahuë' Lë'.

48 Ní'irö Jesús rë' lë':

—Judas, ¿naru' rudöditso' caní neda', Bönni' Guljë' Bönachi, rutsaga lo' neda'?

49 Cate' yugu' bönni' na' nacua'lenë' Jesús bila'lë'enë' ca na' raca queë' Lë', të' Lë':

—Xan, ¿naru' gü'ítu' légaquië' guíë tuchi'?

⁵⁰ Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla.

⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le.

⁵² Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' bití' ta'lé'enë' Lë' dxi'a, rnnë':

—¿Narúajtsali' nuá'ali' guié tuchi', en yaga para sönli' neda' ca runli' rizönli'-në' gubán?

⁵³ Yugu' dza guzóalen caza' libí'ili' chila yudo', ate' bití' bi benli' quia', pero na'a chibidxín dza queë'li', le naca dza dë lu në'e nu na' zoa lataj chulla.

Rnnë' Pedro: "Bití' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yöjnahuë' Jesús zi'tu' zí'tu'sö.

⁵⁵ Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro gurö'lenë' légaquië' tsözxön.

⁵⁶ Cate' tubi' bi'i nigula huen dxin bilé'ebi'-në' Pedro, ni' röö'së' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, bití' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné’:

—Bönni’, calëga neda’.

⁵⁹ Ia’láti’sö gudzé, gunné’ ia’túë’ bönni’:

—Le nácatë bönni’ ni dë’ë Jesús, tu’ náquië’ bönni’ Galilea.

⁶⁰ Ní’irö Pedro gunné’:

—Bönni’, bití’ nözda’ bizxi na’ ru’u didza’ que.

Tsanni ni’ ru’ë didza’ ni, la’ gurödxitëba’ böra.

⁶¹ Ní’irö buécjë’ Xanru’, en ruyúë’ Pedro, ate’ yöjnenë’ Pedro xtídzë’ë Xanru’, ca na’ gudxë’ lë’: “Zí’alö cödxiba’ böra na’a, li’ chigudá’bagu’u tsonna luzuí, innó’ bití’ núnbë’u neda’.”

⁶² Burúajë’ Pedro ní’ilö, ate’ rön caz gurödxë’.

Tu’titjë’ Jesús

(Mt. 26:67-68; Mr. 14:65)

⁶³ Yugu’ bönni’ na’ nazöngaqüë’ Jesús bulu’titjë’ Lë’, ate’ gula’guínë’ Lë’.

⁶⁴ Ní’irö bulu’sayjë’ lahuë’ Jesús, ate’ gula’gápë’ë lahuë’, en gula’nábinë’ Lë’, ta’nnë’:

—¡Gunnëya’atsöca’! ¿Nuzxi na’ gudapa’ Li’?

⁶⁵ Ziánrö ca’ gula’nnë’ queë’ le gulu’ë dö’ queë’.

Ridxinë’ Jesús lógaquië’ bönni’ yudo’ tu’chi’a tu’söröë’

(Mt. 26:59-66; Mr. 14:55-64; Jn. 18:19-24)

⁶⁶ Cate’ chizá’ rení’ dza na’, bulu’dubë’ bönni’ gula tu’zéajni’inë’ bönachi judío len yugu’ bixúz unná bë’, en bönni’ yudo’ tu’sédinë’, ate’ gula’chë’ë Jesús lógaquië’ bönni’ yudo’ tu’chi’a tu’söröë’, ate’ gula’nábinë’ Lë’,

⁶⁷ ta’nnë’:

—Gudíxjöi’i netu’. ¿Naru’ nactso’ Li’ Cristo?

Jesús rë’ légaquië’:

—Channö guía' libí'ili' naca' Cristo, bití' tséajlë'ëli' neda',

⁶⁸ en channö inábida' libí'ili' tu didza', bití' ubí'ili' didza', en bití' usanli' neda'.

⁶⁹ Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nalí queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuínë' yúgu'të bönni' zían ni', ate' gula'chë'ë Jesús lahuë' Pilato,

² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guízxaj laz ruquízxjë' César, en rnnë' lë' cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzö'lida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bëë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea.

⁷ Cate' gunözinë' nababë' Jesús ga ni' rinná bëë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzéjanë', tu' chiguca xidzé ré'enë' ilé'enë' Lë' tu' chibiyönnë' le zián ca naca queë' Jesús, en runë' löza ilé'enë' tu yöl-la' huáca gunë'.

⁹ Ní'irö Herodes gunábinë' Jesús le zián, pero Jesús biti' bi didza' bubi'ë.

¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'.

¹¹ Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato.

¹² Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'tué'.

Ta'chúguië' queë' Jesús gátie'
(Mt. 27:15-26; Mr. 15:6-15; Jn. 18:39-19:16)

13 Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö,

14 ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzöldida' le naca xíguia' nabáguë'ë, yugu' lë na' ruzégui'li'-në' didza'.

15 Cate' gusöl-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'.

16 Na'a usaca' zi'a-në', ate' tödi na' usana'-në'.

17 Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'.

18 Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

19 Nadzunë' Barrabás na' lidxi guié tu' gudíl-lalenë' yúlahui' lu yödzö na', en tu' bëtië' bönachi.

20 Bulidzë' Pilato légaquië' leyúbölö, tu' rë'ënë' usanë' Jesús.

21 Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

22 Ní'irö Pilato gudxë' légaquië' le bunny luzuí, rnnë':

—¿Bizxi caz le ruá' dö' benë' bönni' ni? Biti' bi budzöldida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

23 Zídzajrö gulu'ë didza', ta'nabë' tē'ë Jesús lë'e yaga cruz. Tu' gula'bödxi'ë yenni' yugu' bönni' na', en yugu' bixúz unná bë', gula'déli'në' gaca ca na' tē'ënnë'.

24 Ní'irö Pilato guchúguië' queë' Jesús, para gaca queë' ca na' ta'nabë'.

25 Busanë' quégaquië' bönni' na' nadzunë' lidxi guië tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' tē'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

26 Cate' ni' ta'chë'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cüdzu'lë' Jesús.

27 Bönachi zián, enca' yugu' nigula söjné'gaca Jesús, ta'bödxinu nigula na', en ta'bödxu yéchi'nu queë' Lë'.

28 Ní'irö buécjë' Jesús, en ruyúë' lé'gacanu, ate' rë' lé'gacanu:

—Libí'ili' nigula Jerusalén. Biti' cödxili' quia' neda', pero guli'cödxu que quézili', en qué'gacabi' zxi'inili'

29 tu' huadxín dza ila'nná: “Bica' bágaca yugu' nigula huödx, en nigula bitu' guluá'anu-bi' bí'ido', en bitu' bulu'gádxu'nu-bi' bí'ido'.”

30 Ní'irö ila'sí lógaca ila'nná bönachi, ilë' yugu' guí'a sibi: “Guli'dubága' netu'”, en ilë' ca' yugu' guí'ado': “Guli'cachi' netu'.”

31 Channö caní tunë' quia' neda', naca' ca tu yaga ya'a, ¿naru' cabi ilüntë're' ca' queë'li', nácali' ca yaga bidxi?

32 Gula'chë'ë ca' chopë' bönni' tuá' dö', para ilútië' lé'gaquië' tsözxön len Jesús.

33 Cate' bila'dxinë' lataj nazí'i le Calavera, le rna len didza' xidza' Lataj Que Böga' Ícjaru', bulu'dě'ě Jesús lě'e yaga cruz. Bulu'dě'ě ca' lě'egaca yaga cruz chopě' bönni' tuá' dö'. Tuě' bulu'dě'ě cuita lě'ě iběla Jesús, en ia'túe' bulu'dě'ě cuita lě'ě yögöla.

34 Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lě'ě que queëgaquië' le nácuë' Jesús, en bulu'quitjě' le gaca bē' lahui.

35 Bönachi nacuá' ni' tu'yú, en yugu' bönni' dē lu ná'agaquië' bulu'titjě' Jesús, ta'nně':

—Yugu' nu yúbölö busölě' bönni' ni. Na'a ralla' usölá cuinë' channö náquië' Cristo, bönni' gurö cazē' Dios.

36 Yugu' bönni' na' röjáquië' gudil-la bulu'titjě' ca' Jesús. Gula'biguë'ë ga na' zoë', en bulu'gui'jě' Lē nupi zi,

37 ta'nně':

—Channö nacu' Li' bönni' inná bé'enē' bönachi judío, busölá cuinu'.

38 Da' ca' lě'e yaga cruz icjlě' Jesús tu le nazúaj lu guichi lu didza' griego, en lu didza' latín, en lu didza' hebreo, le rna caní: “Bönni' Rinná Bé'enē' Bönachi Judío.”

39 Tuě' bönni' huiá' dö' na' dē'ě lě'e yaga cruz bulidza zi'ě Jesús, rnnë':

—Channö nacu' Li' Cristo, busölá cuinu', enca' netu'.

40 Bubi'ë didza' ia'túe' bönni' huiá' dö' na', en gudil-lě' luzě'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátiu'.

41 Le nácatë rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

42 Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

43 Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

44 Cate' bidxín idú huagubidza, guchul-la idútë yödzölió ga bidxinrö idú ridödi xihuó.

45 Guchul-la gubidza, ate' lari' nal-la' lu yudo' biröza' chopa dí'ilö.

46 Ní'irö bë'ë zidzaj didza' Jesús, rnnë':

—Xuz, rigú'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

47 Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahuí'.

48 Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuójgaquië' yödzö, ta'gapa' luchú'ugaquië' tu' tu'bánninë'.

49 Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yöjácalennu Lë' cate' ni' gudé' luyú Galilea, ate' tu'yúë' lë ni raca.

*Rigáchë'ë Jesús yeru ba**(Mt. 27:57-61; Mr. 15:42-47; Jn. 19:38-42)*

⁵⁰ Zoë' ca' ni' tu bönni' yödzo Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios.

⁵² Ní'irö guyijë' José na' lahuë' Pilato, en gunabë' lataj u'ë Jesús.

⁵³ Cate' chinuzötjë' Lë', buchölinë' Lë' lari', ate' gulu'ë Jesús yeru ba, le nadaj lë'e guí'a guiöj, ate' lu ba na', cuntu nu nagü'iguequinë'.

⁵⁴ Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

⁵⁵ Yöjácanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'ë Lë' ni'.

⁵⁶ Cate' yöjhuöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

24*Rubanë' Jesús lu yöl-la' guti**(Mt. 28:1-10; Mr. 16:1-8; Jn. 20:1-10)*

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légacanu ia'bálanu nigula.

² Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queë'.

³ Cate' gula'yázanu yeru ba na', bití' bulu'dzölinu zoa Xanru' Jesús ni'.

⁴ Cate' ni' ta'bö'önu böniga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuínë' ga na' nacuá'anu.

⁵ Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' të' légacanu, ta'nnë':

—¿Bizx que ruguílajli' nu zoa nabán xilataj nu nati?

⁶ Biti' zoë' ni, tu' chibubanë'. Guli'tsöjné lë na' chigudxi cazë libí'ili' cate' ni' zoë' luyú Galilea.

⁷ Gunnë': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dë'ë neda' lë'e yaga cruz, ate' ubana' cate' gaca tsonna dza."

⁸ Ní'irö yöjnégacanu didza' na' bë'ë Jesús,

⁹ ate' bulu'zá'anu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zíca'rë' ca', ca naca lë na' guca.

¹⁰ Nigula na' yöjtíxjöi'iguequinu bönni' gubáz na' yugu'lë ni, nácagacanu María Magdalena, en Juana, en María, xinë'ë Jacobo, en ia'bál-lanu nigula na' dzágagacanu légacanu.

¹¹ Guléquinë' bönni' gubáz na' tu'ínu didza' chixi, en bití' gula'yéajlë'ë légacanu.

¹² Ní'irö guyasë' Pedro, en carelö sa'yéajë' ra' yeru ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

*Le guca la' nöza ridxintë Emaús
(Mr. 16:12-13)*

13 La' dza ná'asö sōjáquië' chopë', yú'ugaquië' nōza le ridxintë Emaús, le rō'ö ca chopa hora rizá'aru' Jerusalén.

14 Yú'ugacasë' ca' nōza, tu'ë didza' ca naca yúgu'të lë na' guca.

15 Tsanni ni' yú'ugaquië' nōza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsōzxön.

16 Biti' bulu'únbë'ë Lë' tu' naca ca tu le nabaga' guiōj lógaquië'.

17 Ní'irö Jesús gunábinë' légaquië', rnnë':

—¿Bizxi didza' na' ruí'ili' la' libí'isili' yú'uli' nōza?
¿Bizx que na' ruhu'ínili'?

18 Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yōdzö Jerusalén, en tuzu' li' bití' nōzinu' lë na' guca néaje nasi ni'?

19 Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi.

20 Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátie', ate' bulu'dé'ë Lë' lë'e yaga cruz.

21 Netu' bentu' löza gúquië' Lë' bönni' na' ral-la' huöá'uë' bönachi Israel, pero na'a chiguca tsonna dza cate' gulaca lë ni.

22 Ia'stú, bál-lanu nigula nútsa'gacanu netu' gulunnu ga gurö'ötu' böniga. Yöjácanu ra' yeru ba queë' cate' si' gulén gubidza na'a dza,

23 en cate' biti' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë légacanu zoë' nabanë' Jesús.

24 Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

25 Ní'irö Jesús gudxë' légaquië':

—Libi'ili', bönni' biti' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios.

26 ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtërë'?

27 Ní'irö gusí lahuë' Jesús riguixjöi'inë' légaquië' yúgu'të le ruí'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

28 Cate' bila'dxinë' yödzödo' ga na' söjáquië', benë' Jesús ca tu bönni' zéajtërë' zi'tu'.

29 Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'.

30 Cate' ni' Jesús rö'ë rágulenë' légaquië', gudélë'ë yöta xtila, en gudxë' Dios: "Xclenu'." Ní'irö buzx-uzxjë' le, en bë'ë quégaquië'.

31 La' ní'isö bidúa lë na' gubaga' guiöj lógaquië', ate' bulu'únbë'ë Jesús, ate' Lë' buniti cuinë' lógaquië'.

32 Ní'irö gulë luzë'ë tuë' ia'tué':

—¿Naru' cabí böála'tica' ládxi'do'oru' tsanni ni' ru'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

³³ La' ní'isö gula'zuínë' yöjhuöjgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'.

³⁴ Ní'irö yugu' bönni' na' nacu'ë ni' gulë' chopë' na':

—Chibubán cazë' Xanru', en buluí'i lahuë', ate' bilé'enë' Simón Lë'.

³⁵ Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzzuxjë' yöta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn. 20:19-23)

³⁶ Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Guli'sóa dxi ládxi'li'.

³⁷ Ní'irö guladxi gula'dzöbinë' tu' téquinë' bixín ta'lé'enë'.

³⁸ Jesús rë' légaquië':

—¿Bizx que rö'öli' böniga? ¿Bizx que rizá' ládxi'li' yugu' lë ni?

³⁹ Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ni' ru'isë' ca' didza' ni, bulu'inë' légaquië' në'ë, en ni'ë.

⁴¹ Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

⁴² Ní'irö bulu'nödzjë' queë' láti'do'oba' böla chinégui'ba', en tu quízxi'ba' buz.

⁴³ Guzxi'ë Jesús le, en gudahuë' lógaquië'.

⁴⁴ Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunniá': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazi'i le Yugu' Salmo, ca ral-la' gaca quia' neda'.

⁴⁵ Ní'irö buzéajni'inë' légaquië' lë na' nazúajgaca lu guichi lá'ayi.

⁴⁶ Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza,

⁴⁷ ate' idútë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na'

⁴⁸ ate' libí'i cázali' na' bilé'eli' yugu' lë ni ral-la' gunli' ba nali' que.

⁴⁹ Buli'yútsöca', isöl-la'a queëli' le guxzí' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

⁵⁰ Ní'irö Jesús guchë'ë yugu' bönni' dá'gaquië' Lë', söjáquië' yödzö Betania, ate' ni' guchisa në'ë, en bulidza tsáhuë'ë légaquië'.

51 Tsanni ni' rulidza tsáhui'së' ca' légaquië',
buzá'atë' ga na' nacu'ë, buëpë' yehua' yubá.

52 Gudödi gula'yéaj ládxi'gaquië' Lë', lu yöl-la'
rudzeja quégaquië' yöjhuöjgaquië' Jerusalén.

53 Gula'cuá'tica'së' chila yudo', ta'gu'ë Dios yöl-
la' ba, en tun zxönë' Lë'. ¡Ca' naca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25